


NGOLO YA NZAMBI

SAMU NA KUSOBA

 Matondo na nge, mpangi-bakala. [Mpangi Carl Williams me tuba, “Ya kieleka ya kele bweso ya kieleka na kuvwanda na Mpangi Branham na kukwisa bambala mingi na Phoenix. Mu banza ti yandi ke kwisaka na Phoenix mingi kulutila bisika yankaka. Mpe beto zola yandi landila kukwisa, kaka ntangu nionso yina mu kele awa na nziunga, na mutindu nionso. Nzambi sakumuna nge, Mpangi Branham.”] Matondo—matondo na nge, Mpangi Williams.

Mbote, bankundi. Mu kele. . . Yayi ya dibuta ya Shakarian, Mpangi Williams mpe Mpangi-kento Williams mpe mingi ya yankaka awa me zaba yawu. Mu monaka yawu na vision, pene ya bamvula zole to tatu na ntwala yandi kubela, mpe ya me salama.

² Mpe mvula me luta beto vwandaka awa, mu ke kwikila ya vwandaka na Ngonda ya ntete, na lukutakanu mosi, ya vwandaka ntangu yina nganga-Nzambi yina (Yinki kele nkumbu ya yandi? Mu me zimbana nkumbu ya yandi ntangu yayi.) vwandaka awa. [Muntu mosi me tuba, “Stanley.”—Mu.] Stanley, Evêque Stanley, ya dibuundu ya Catholique. Beno ke bambuka moyo ntangu yandi natilaka munu Biblia, beno zaba, mpe yandi tubaka na munu. . .

Ya vwandaka na baprofesi mingi, “Mwana ya munu ya kento, nge me beluka.”

³ Mpe yandi zabaka ti vision me tuba ti yandi ke beluka ve. “Yandi ke kufwa na ngunga ya zole to ya tatu na suka.” Beno ke bambuka moyo na yawu? [Muntu mosi me tuba, “Yinga.”—Mu.] Na yina, na ngunga ya zole to ya tatu.

⁴ Mpe mu lendaka ve kutuba na Demos. Mpe kasi mu tubaka na bokilo ya yandi, kaka kuna na kati ya kivinga, kaka na ntwala ya kisika yayi. Mu tubaka, “Yandi ke beluka ve.”

Mama Shakarian tubaka, “Mbote, muntu nionso ke na kupesa profesi.”

⁵ Mu tubaka, “Ya kieleka, mu lenda sala kifu, munu mosi, kasi mu tubaka yawu. Yandi ke beluka ve.”

⁶ Mu tubaka na bawu mingi, pene ba bamvula tatu me luta, “Mu me mona yandi ke kwenda mbangu samu na luzingu ya yandi, mpe yandi me kwenda na mbeto. Mpe yandi telemisaka maboko ya yandi mpe yandi bokaka na munu, mutindu yina. Mpe mu—mu lendaka ata kusimba yandi ve. Na manima mu monaka yandi me kufwa. Mpe mu talaka, mpe ya vwandaka na

kima mosi, ya vwandaka na monte le mosi, mpe ba me tuba ti ya kele kima mosi kati-kati ya ngunga ya zole mpe ya tatu.”

⁷ Mpe na yawu évêque tubaka, “Mbote, mu ke tala kaka mpe mu ke mona wapi mutindu yina ke salama.” Na yina, ya salamaka.

⁸ Beto kele ya kieleka na kiadi. Mu ke mona ti dibuundu me zimbisa muntu mosi ya nene, ya kele Mpangi-kento Florence Shakarian. Kasi, yandi vwandaka muyimbi mikunga ya nene, yandi vwandaka kento ya kufulukuka na Mpeve.

⁹ Mu vwandaka na mama ya yandi; mama ya yandi vwandaka mosi ya bantu ya ntete mu kutanaka na yandi na Côte Ouest, ntangu mama ya yandi belukaka. Ntangu badokotolo . . . Yandi vwandaka na komá, mpe ya kukonda mingi. Mpe na yina dokotolo yina vwandaka kuna tubaka na munu, yandi tubaka, “Ntangu yayi beno vwanza kieleka swi ntangu beno ke sambila. Beno tula ve makelele mingi. Kento yango ke na kufwa.”

Mu tubaka, “Yinga, tata.”

¹⁰ Mpe yandi tubaka, na yina, yandi landilaka kaka na kutuba na munu. Mpe, mbote, mu ke ata na siansi ve samu na kuzibula yinwa ya munu, mutindu munu.

¹¹ Na yina, ya vwandaka Mpangi Demos tubaka na munu na kukwenda na ntwala mpe kumata kuna mpe kumona yandi.

¹² Na yina, mu mataka na zulu. Mpe Florence vwandaka me fukama na ntoto, na yina mwa mwana-kento mosi ya kitoko, mpe kulutila bakento yankaka. Mpe mu kwendaka kuna mpe sambilaka samu na yandi, mpe mu tubaka yawu. Mpe yandi vwandaka zaba kima ve. Mpe mu tubaka na yandi ti yandi lendaka telama diaka. Mpe yandi salaka yawu. Bamvula zole to tatu lutaka, yandi kufwaka. Mpe ntangu yayi Nzambi ke pesaka mvutu na bisambu ya beto.

¹³ Mpe beto zaba ti, beto ke kwikila ti beto nionso me kwisa awa na luzolo ya Nzambi, mpe beto ke kwenda mutindu mosi. Mosi na mosi, beto nionso ke luta na mwelo yina. Mpe yawu yina beto kele awa na suka yayi, beto me vukana kintwadi na Ngwisani ya Bantu ya Mumbongo ya Baklisto, samu na kutuba samu na bima yayi, mpe kukubika bawu, samu beto zaba ti ya kieleka ya ke kwisa.

¹⁴ Ntangu yayi Mpangi-kento Florence kele kento ya ntwenia, ya bamvula makumi yiya na zole, Mpangi Williams kaka me tuba na munu, mpe ya kele kieleka ntwenia. Kasi na ntwala bawu . . . yandi zabaka ti yandi vwandaka na kimbevo yayi, na yina, mu monaka vision samu na yandi, mpe tubaka na munu kubeluka ya yandi. Na yina, ya ke vwanza . . . Nzambi zaba nionso samu na yawu, mpe yandi monaka Yesu na kati ya kivinga na ntwala yandi kwenda. Beto zola ve kaka kusambila samu na yandi, samu beto me sala yawu mingi. Beto zola kaka kutonda Nzambi samu

na luzingu yina vwandaka na kati-kati ya beto, yina me twadisa beto nionso na kimpeve, mutindu Mpangi-kento Shakarian.

¹⁵ Mpe beto zola kusambila samu na Mpangi Demos, Mpangi-kento Rose. Mpe beno bambuka moyo, ba kutanaka na mpasi mingi na luzingu ya bawu, na ntangu me luta. . . ya kele tata ya yandi, mpe mpangi ya yandi ya kento ntangu yayi na. . . bamvula ya yandi ya nsuka. [Muntu mosi ke tuba na Mpangi Branham—Mu.] Kasi, mpe, yinga, na nsi ya. . . na nsi, bangonda kumi; mpe Mpangi-kento—Mpangi-kento Edna, diaka.

¹⁶ Na yina, mu zaba wapi mutindu kukabula mpasi na Mpangi Demos. Mu vwandaka na tata, mpangi ya bakala, kento, mpe bébé, yina kwendaka na kati-kati ya mwa bilumbu fioti, na yina mu—mu zaba wapi mutindu yandi ke kuwa na suka yayi. Beno me zaba kaka ntangu beno me telema na basapatu yayi, ya kele ntangu beno me zaba wapi mutindu kukabula mpasi. Mpe. . .

¹⁷ [Systeme ya kumatisa ndinga me sala makelele—Mu.] Mu me sala yawu munu mosi. Beno lemvokila munu. Mu me bula fioti mwa gadget kisika mosi awa, na diboko ya munu. Na yina mu me matisa yawu mingi, mpe mu zolaka sala mutindu yina ve.

¹⁸ Na yina beto telama ntangu yayi ntangu beto. . . kana beno me zola, kana ya kele. . . Beto kulumusa yintu ya beto.

¹⁹ Tata ya Mazulu, beto me vukana awa na suka yayi samu na kusambila Nge, mpe samu na kupesa na Nge matondo mpe lukumu, samu na kufidisa Yesu Mukudi ya beto, ti beto kele na kivuvu na manima ya luzingu yayi ke suka, na kumonaka ti ya kele kieleka ve ti beto ke zinga awa ntangu nionso. Mpe, Tata, samu na kumona mitindu ya kiadi banzutu yayi ke kukota, beto kele na kiese ti beto fwana vwanda awa ntangu nionso ve. Nge me sala nzila ya kutinina, kuna na kati ya kiwanda ya lufwa.

²⁰ Mpe, Tata, beto ke vutula matondo na Nge na suka yayi, samu na luzingu ya muntu yina vwandaka na beto, na nsi ya mvula mosi me luta, na kuyimbilaka balukumu ya Nge; Mpangi-kento Florence Shakarian, mutindu beto me zaba yandi. Mpe Nge me tuba na beto kubanda ntama na ntuala, ata mpe bamvula, ti yayi ke salama, ti ya lendaka vwanda ve shoki ya nene samu na beto. Mpe beto zaba ti Nge ke tubaka kieleka. Na yina Ndinga ya Nge me tuba, “Muntu yina me butuka na kento, kele na bilumbu fioti mpe bampasi mingi.” Beto zaba ti ya kele kieleka, diaka, Mfumu. Beto zaba beto nionso fwana luta na kiwanda yina. Na yina beto ke tonda Nge samu na luzingu ya yandi yina vwandaka awa na zulu ya ntoto. Mpe na kukwikilaka na lukwikilu, ti ntangu yayi, na suka yayi, yandi me luta yinzo yayi ya kiadi ya peste, yandi me kota na nzutu ya nkembo yina lenda kubela ata fioti ve. Mpe banzayilu ya yandi ya kuyimba, mpe ndinga vwandaka na yandi, mpe mpeve ya yandi ya kifuluka na lemvo na Klisto! Kana yandi lendaka vutuka na suka yayi, yandi ke sala yawu ve na mutindu ya beto; yandi

zolaka luta na nionso yayi diaka. Na yina, ntangu yayi ya me suka, yandi kele na mama ya yandi mpe tata ya yandi. Ba me bokila bébé ya bawu na yinzo. Na yina, beto—beto ke tonda Nge.

²¹ Beto zola sambila diaka samu na kikesa, samu na Mpangi ya beto ya bakala Shakarian, mpangi ya beto ya bakala ya luzolo, na kuzabaka ti luzingu yina yandi me zinga, mpe bankwamusu yina yandi ke na kuluta na bilumbu yayi ya nsuka, mpe wapi mutindu yandi kele; kumona yandi, mpe bansuki ya yandi ke telumuka, mpe mapeka ya yandi ke niefwama, mpe kasi na kumekaka na kubikala na kilanga ya Nzambi. Nzambi, pesa yandi ngolo bubu yayi. Beto ke sambila, Nzambi, ti Nge ke pesa yawu. Samu na bayina nionso na kiadi na kukwenda ya bawu, beto ke sambila na mosi na mosi.

²² Mpe bika ti beto, Mfumu, mutindu beto ke banza na yayi, bambuka moyo ti beto mpe fwana kwenda kilumbu mosi. Na ntangu beto me vwanda kintwadi awa na Mvwandulu ya Mfumu Yesu, beto ke lomba ti Nge ke nata lembami yayi ya mabanza ya beto. Mpe bika beto tala mbote, mutindu ya vwandaka, to beto kutalulula baluzingu ya beto, ti beto kele na nsi ya Menga mpe na Lukwikilu. Pesa yawu, Mfumu.

²³ Ntangu yayi na yina mu ke meka na bantangu yayi na kunata nsangu mosi ya fioti na bantu, bubu yayi, mu ke sambila ti Nge ke sadisa munu, Mfumu. Pesa munu ngolo, samu mu—mu—mu ke na nsatu ya yawu, Mfumu. Mpe mu ke sambila ti Nge ke pesa yawu. Mpe bika ti kima mosi kutubama yina ke pesa Nge lukumu. Mpe kana ya kele na nsi ya muningu ya ndinga ya beto na suka yayi, yina me kubama ve samu na kukutana ngunga yina kele na ntuala ya bawu, bika yayi kuvwanda ntangu yina ba ke kwisa na Nge Yina tubaka, “Mu kele Nzila, Luzingu, Kieleka,” mpe Mfumu ya beto Yesu Klisto. Samu beto ke lomba yawu na Nkumbu ya Yandi. Amen. (Beno lenda vwanda.)

²⁴ [Muntu mosi na estrade ke tuba na Mpangi Branham—Mu.] Mpangi-bakala yayi awa zola kuzaba kana muntu mosi lenda kuwa mbote mingi. Yandi me zibula ba-micro zole. Ya kele mutindu yina? Beno lenda kuwa? Beno telemisa maboko ya beno kana beno me zola. Beno lenda kuwa? Beno telemisa maboko ya beno. Mbote mingi.

²⁵ Mu ke na kiadi ti beto kele na kivinga yina kele na bisika ya kuvwanda ve samu na bantu nionso na suka yayi. Mpe beto ke tula kivuvu ti mu ke vwanda awa ntangu mingi ve, kaka mingi ntangu yankaka ke nata beto lutangu ya Ndinga; ti Mfumu Nzambi ke zitisa Ndinga ya Yandi yina ke tangama, mpe ke pesa beto lemvo ya Yandi, ti beto fwana sadila Yandi na nzila ya yawu.

²⁶ Ntangu yayi ba me tuba na munu na Billy Paul, na suka yayi, ti ya lendaka salama ti beto ke tuba na Lumingu ke kwisa na Assemblée de Dieu ya Grantway, na Tucson. Kana ya kele na muntu mosi awa ya Tucson, mu lendaka mona beno ve na

sabala yayi. Mu ke vwanda na Assemblée de Dieu ya Grantway, na Lumingu ke kwisa.

²⁷ Na yawu ntangu yayi beto me katuka kaka kuna na Este, mpe na kutala mu me lemba mingi, samu na kudiaka mingi, landila lutondo ya mingi ya bantu kuna na bamongo. Mpe—mpe mu me bela, na yina mu me kuwa mbote ve sabala yayi. Na yawu, beno sambila samu na munu. Mpe . . .

²⁸ [Muntu mosi me tuba, “Ba-opossum mingi.”—Mu.] Yinki nge me tuba? [“Ba-opossum mingi.”] Mpangi Carl Williams na mutindu ya yandi ya kusakana, mpe mu ke banza beto ke na nsatu ya yawu kaka na ntangu yayi, yandi me tuba, “Ba-opossum mingi.” Mu zaba ve na yawu, Mpangi Carl, kasi bampandi mingi.

²⁹ Na yina beno zola sambila samu na muntu mosi na suka yayi, na yawu, mu—mu ke sepela kieleka kana ya ke vwanda na bisambu ya beno yankaka samu na munu, samu mu—mu ke na nsatu ya yawu.

Ntangu yayi beto zola sala nswalu samu na kukota na Ndinga.

³⁰ Mpe mu ke zola ve kukanga beno awa ntangu mingi, samu mu ke kwikila ti ya kele na connection telephonique na kati ya yinsi, na suka yayi, yina ke kwenda bisika nionso katuka Côte Ouest tii na Côte Est, katuka na Nord mpe Sud. Ba-assemblée mingi, mingi kele na ngwisani yayi mutindu beno nionso kele na yawu awa na tabernacle. Ya ke wakana diaka na Phoenix, ti bisika nionso balukutakanu kele, ya ke kwisa kaka na . . . Mpe ba me vukana na bayinzo-Nzambi mpe na bayinzo, mpe bima nionso yina, na nsi ya kitembo ya kitoko. Ba ke tuba ti ya kele mpe mbote mingi kulutila manaka ya television. Ya kele connection telephonique, ba ke tula recepteur to microphone, to nionso yina ya kele, na kati ya kivinga. Mpe bawu . . . Kento ya munu tubaka, na ntangu mu katukaka na Indiana na sabala me luta, kuna na Tucson, ya vwandaka kaka mutindu mosi mutindu kuvwanda na kati ya kivinga. Na yina beto ke sambila ti Nzambi ke sakumuna bayina nionso kele kuna na nsinga ya allo-allo na suka yayi, bisika nionso ba kele. Kuna na New York ntangu yayi ya ke vwanda, oh, na manima ya midi, mpe na bantangu ya kuswaswana mutindu ya ke zabuka yinsi.

³¹ Ntangu yayi kuna na Buku ya ba-Romain, kapu 12, mpe nzila ya 1 mpe ya zole, beto zola—zola kutanga Disonuku yayi.

Bampangi, mutindu Nzambi ke monaka bantu mawa, mu ke na kukindisa beno, na kupesaka banzutu ya beno mutindu munkayulu ya moyo, ya santu, mpe yina yangidikaka yandi, mutindu yina me fwanana na kusadila Nzambi.

Mpe beno landa ve bifu ya bantu ya yinza yayi: kasi beno bika Nzambi kusoba beno mpe kupesa beno mayele ya malu-malu, na yina beno ke lenda na kubakula

mambu ya mbote, mpe ya kulunga . . . mambu ya mbote, ya kudedama, mpe ya kulunga, yina Nzambi ke zolaka.

32 Ntangu yayi, kana Mfumu kuzola, mu ke zola baka dilongi ya munu samu na suka yayi, na zulu ya: *Ngolo Ya Nzambi Samu Na Kusoba.*

Ti beno fwana ve kulanda ve bifu ya bantu ya yinza yayi: kasi beno . . . kusoba beno mpe kupesa beno mayele ya malu-malu, ntangu yayi, beno lenda bakula mambu ya mbote, ya kulunga, mpe ya kudedama, yina Nzambi ke zolaka.

33 Ya kele mukanda ya ntama ya mumesanu yina mingi ya ba-pasteur ya beno vwanda sadilaka na ntangu ya beno. Ba ke sadilaka yawu kubanda ba sonikaka Yawu. Kasi ntete, kima mosi samu na Ndinga ya Nzambi, Ya ke kumaka ata fioti ve ya ntama, samu Ya kele Nzambi. Ya ke kumaka ata fioti ve ya ntama. Na kati ya bansungi nionso ntangu yayi, samu na pene-pene mingi, pene ya bamvula mafunda zole na nkama nana, to kulutula, bantu ke tangaka Ndinga ya Nzambi, banganga-Nzambi, mpe nionso yina, mpe Yawu ke kuma ata fioti ve ya ntama. Mu ke tangaka Yawu, munu mosi, kubanda bamvula makumi tatu na tanu. Mpe konso ntangu mu ke tangaka Yawu, mu ke monaka kima ya malu-malu ti mu talaka na ntangu ya ntete. Samu ti, Ya kele ya kutwadisama na kimpeve, Ya kele Nzambi na mutindu ya mukanda. Beno me mona, Ya kele bisalu ya Nzambi me tubama, mpe ba me tula yawu na mukanda.

34 Bantangu mingi, bantu ke tubaka, “Mbote, ntangu yayi, muntu sonikaka Biblia yayi.” Ve. Biblia me tuba, Yawu mosi, ti Nzambi sonikaka Biblia. Ya kele Ndinga ya Nzambi.

35 Mpe Yawu lenda kubwa ata fioti ve. Yesu tubaka, “Zulu na ntoto ke kubwa, ke luta, kasi Bandinga ya munu ke kubwa ata fioti ve.” Mpe Yawu lenda kubwa ve, mpe na kuvwandaka Nzambi, samu ti Yawu kele kitini ya Yandi.

36 Na yina beno na kuvwandaka mwana ya Yandi ya bakala mpe ya kento, beno kele kitini ya Yawu, mpe yina ke sala beno kitini ya Yandi. Na yina ya kele samu na yawu beto me kwisa vukana kintwadi pene-pene ya Ndinga ya Nzambi.

37 Ntangu yayi mpova yayi *kusoba*, mu me tala na kati ya dictionnaire, mazono. Na yina, mu zimbanaka kaka ntangu ti mu zolaka vwanda awa, ntangu mu vwandaka sosa masonama, mpe mu monaka mpova yayi, to masonama yayi, mu zola tuba, Masonuku. Mpe na kati ya dictionnaire ya me tuba ti ya kele “kima yina me pinduka.” Ya kele “yina me pinduka.” *Yina me soba*, “yina me kuma mutindu yankaka na yina ya vwandaka, ya vwandaka . . . ya kele kifu mpe bima nionso me soba na yawu,” *kusoba*.

38 Mpe mu vwanda banza na suka yayi, na Génèse 1. Yinza yayi vwandaka ya kukondwa mutindu, mpe ya vwandaka mpamba,

mpe mudidi vwandaka na zulu ya ntoto; kima mosi ve kasi kawo ya muvimba. Mpe ntangu yinza yayi vwandaka mutindu yina, Mpeve ya Nzambi vwandaka tambula na zulu ya masa, mpe kifwani ya muvimba sobaka; kubanda na kawo ya muvimba, tii na disamba ya Eden. Yina kele Ngolo ya Nzambi samu na kusoba, yina lenda baka kima yina kele mpamba mpe kusala kima ya mbote na nzila ya yawu. Ngolo ya Nzambi samu na kusoba!

³⁹ Mpe beto ke bakula ti, na kutangaka Masonuku, ti Nzambi vwandaka na bamvula mafunda sambanu—sambanu samu na kusala Eden yayi. Ntangu yayi, Yandi lendaka ve kubaka ntangu ya yinda; kasi kaka kubanza, mpe na kubaka yawu na Masonuku kisika Yawu me tuba “kilumbu mosi na Nzambi, kele bamvula funda mosi na zulu ya ntoto,” ya zola tuba, kana Nzambi lendaka tanga ntangu. Mpe tuba ya vwandaka bamvula mafunda sambanu Yandi bakaka samu na kusala ntoto, mpe Yandi kunaka na zulu ya ntoto bankuna nionso ya mbote. Bima nionso vwandaka kaka ya kulunga kuna.

⁴⁰ Mu ke banzaka, bantangu mingi, ntangu mpe bantu ya masawula ke banda na kutanga Buku ya Genèse, ba ke banda na kusawula Yawu, samu ya ke monana mutindu Ya ke vutukila bandinga Yawu mosi, to ke losa beno awa mpe kuna.

⁴¹ Kasi kana beto ke simba kaka na ntangu fioti, na ntwala beto kota na dilongi ya beto, ti, Moise monaka vision. Mpe Nzambi tubaka na yandi. Nzambi vwandaka tuba na Moise mbunzu na mbunzu, kikoba na dikutu. Ntangu yayi, Yandi tubaka ata fioti ve na muntu mosi mutindu yina, mutindu Yandi salaka na Moise. Ntangu yayi, Moise vwandaka profete ya nene, mosi ya kulutula nene na baprofete nionso. Yandi vwandaka kifwani ya Klisto. Mpe ntangu yayi Nzambi lendaka tuba, Yandi kele na ndinga. Ya me kuwakanaka. Nzambi lenda tuba.

⁴² Mpe Nzambi lenda sonika. Nzambi sonikaka Misiku kumi na musapi ya Yandi Mosi. Yandi sonikaka na zulu ya bibaka ya—ya Babylone ntete, na musapi ya Yandi. Yandi fumbamaka mpe sonikaka na zulu ya zelo na ntangu mosi, na musapi ya Yandi. Nzambi lenda tuba. Nzambi lenda tanga. Nzambi lenda sonika.

⁴³ Nzambi kele Kiziba ya lemvo nionso mpe Ngolo, mpe ya ndwenga nionso ya Kinzambi, kele kati na Yandi. Na yina, na kuzabaka ti, Yandi kele Kiyidiki mosi kaka yina kele. Ya kele na kiyidiki yankaka ve kasi Nzambi. Satana lendaka vanga ve, na mutindu nionso, yandi ke bebisaka kaka yina ba vangaka. Kasi Nzambi kele Kiyidiki kaka mosi.

⁴⁴ Na yina, Yandi vangaka na nzila ya Ndinga. Yandi fidisaka Ndinga ya Yandi. Na yina bankuna nionso yina Yandi tulaka na zulu ya ntoto, Yandi salaka bankuna yina na nzila ya Ndinga ya Yandi Mosi, samu ti ya vwandaka ve na kima yankaka samu na kusala bankuna. Yandi me tula yawu, mpe ya vwandaka na nsi

ya masa. Yandi tubaka kaka, “Bika ti *yayi* kuvwanda, mpe bika *yina* kuvwanda.”

⁴⁵ Ntangu yayi beto ke mona ti, bantangu mingi, ya ke monana mutindu Biblia ke vutukila mambu to kutuba kima na yina Yawu tubaka ve. Mumbandu, na Genèse 1 beto ke mona ti, “Nzambi vangaka muntu na kifwani ya Yandi Mosi, na kifwani ya Nzambi Yandi vangaka yandi; bakala na kento Yandi vangaka bawu.” Na manima Yandi landilaka, mpe bima mingi salamaka na zulu ya ntoto.

⁴⁶ Na manima beto ke mona ti, ya vwandaka na muntu ve samu na kubundula ntoto. “Na yina Nzambi vangaka muntu na putulu ya ntoto.” Yina vwandaka muntu ya mutindu yankaka. “Mpe Yandi fulaka mpeve ya luzingu na kati ya yandi, mpe yandi kumaka moyo ke zinga.”

⁴⁷ Muntu ya ntete vwandaka na kifwani ya Nzambi, yina kele Mpeve. Jean 4, me tuba, “Nzambi kele Mpeve, mpe bayina ke sambila Yandi fwana sambila Yandi na Mpeve mpe na Kieleka.” Kasi Nzambi kele Mpeve. Mpe muntu ya ntete, yina Yandi vangaka, vwandaka muntu-mpeve, mpe yandi vwandaka na kifwani mpe ya kufwanana na Nzambi.

⁴⁸ Na manima Yandi tulaka muntu yayi na kati ya nzutu, mpe muntu kubwaka. Na yina Nzambi kulumukaka mpe kumaka na kifwani ya muntu, ti Yandi lendaka vuukisa muntu yina kubwaka. Ya kele disolo ya kieleka ya Nsangu ya mbote, landila mabanza ya munu—ya munu.

⁴⁹ Ntangu yayi, Nzambi, na bamvula mafunda sambanu, kunaka bankuna yayi nionso ya kitoko, to Yandi tubaka Ndinga ya Yandi. “Ya ke vwanda mutindu *yayi*. Yinti *yayi* ke vwanda. *Yayi* ke vwanda.” Bima nionso vwandaka ya kulunga. Ya vwandaka kaka mbote. Mpe Yandi tumaka mosi na mosi ya bankuna yina ti ba ke vwanda, ba ke soba bawu mosi na kimenina ya mutindu ya luzingu yina Ndinga ya Nzambi zonzaka na kati ya bawu ba ke vwanda. Kana ya vwandaka yinti ya chène, ya vwandaka basisa chène. Kana ya vwandaka diba, ya vwandaka basisa diba.

⁵⁰ Samu, Kiyidiki ya nene me basisa Ndinga ya Yandi, mpe nkuna ya Ndinga vwandaka kuna na ntwala nkuna ya kieleka kusalama. Mpe Ndinga salaka nkuna. Beno me mona, “Yandi salaka yinza na bima yina ke monanaka ve.” Beno me mona, Yandi—Yandi salaka yinza na Ndinga ya Yandi. Nzambi samunaka nionso na kuzinga.

⁵¹ Mpe na kuvwandaka Nzambi, Kiyidiki, samunaka nima nionso na kuzinga, ya fwana vwanda yinza ya kulunga. Ya vwandaka kisika ya kitoko. Ya vwandaka paradiso ya kieleka ya ntete awa na zulu ya ntoto.

⁵² Ntangu yayi, konso kisika fwana vwanda na quartier général kisika mosi kuna. Lukutakanu yayi kele na quartier général,

mpe kimvuka yayi kele na quartier général, mpe dibuundu kele na quartier général. Mpe Nzambi kele na quartier général. Mpe na yina kisika yayi ya nene, yinsi yayi beto ke zinga, ya kele na quartier général. Mpe na yina Eden yayi ya nene vwandaka na quartier général, mpe quartier général ya yawu vwandaka na ntuala na kati ya disamba ya Eden, to na Eden, na este ya disamba.

⁵³ Mpe Nzambi tulaka na zulu ya yayi, samu na kutwadisa luvangu ya Yandi nionso ya nene na zulu ya ntoto, mwana ya Yandi ya bakala mpe kento ya mwana ya Yandi ya bakala, Adam na Eve.

⁵⁴ Nzambi vwandaka Tata ya Adam. “Adam vwandaka . . . mwana ya Nzambi,” landila Masonuku. Yandi vwandaka mwana ya Nzambi.

⁵⁵ Mpe Nzambi sadilaka yandi lusalusu, na nzutu ya yandi mosi; ntangu yankaka mpanzi mosi na zulu ya ntima ya yandi, samu yandi ke vwanda pene-pene ya yandi, mpe sadilaka yandi lusalusu. Ya kieleka ya vwandaka ve kento ya yandi ntete, kulutila diaka ya vwandaka ve bakala ntete; Yandi vwanda tubila yawu kaka. Mpe ya kele kisika yina mpasi kwisaka, Satana zabaka yandi na ntuala ya Adam. Na yina, ya vwandaka kaka Ndinga ya Yandi ti Yandi tubaka.

⁵⁶ Mu ke tuba ti, mu ke zola kulutisa ntangu mingi na zulu ya yawu. Kasi bayankaka na kati ya beno lendaka vwanda na mubulu fioti, mingi-mingi bayankaka na kati ya beno bantu kuna na—na Sud, ke mona yayi fioti mutindu mubulu, samu na Nsangu yina mu ke na yawu me katuka na Nzambi bubu yayi, samu na bantu, samu na nkuna ya nioka. Mpe mu ke vutuka na yinzo, kana Mfumu kuzola, mosi ya bilumbu yayi, na Jeffersonville. Mu ke zola nsangu pene ya ngunga sambanu, mpe kusungika nionso yayi, beno me mona, na yina ya ke tula yawu kaka na mutindu yina beno ke zaba yina beto ke na kutuba. Mpe ya kele **MUTINDU ME TUBA MFUMU**. Ya kele kaka kieleka mutindu ya vwandaka ntangu Ya monaka Mpangi ya beto ya kento Florence na ntuala yandi kukwenda, bamvula mingi. Beno me mona, Ya kele Kieleka. Mpe ntangu yayi, beto . . . ntangu yankaka ba me bakula yawu mbote ve.

⁵⁷ Kana muntu mosi lendaka kwisa na munu, na kima mosi ya kuswaswana, mu zolaka kaka kubakula yawu mbote ve, munu mosi. Mu zolaka ve kusawula yina muntu mosi me tuba. Beto fwana ve kusawula mosi na yankaka. Mu me kubwa ve na kusalaka yawu; mu ke tonda Mfumu. Mu me sawula disumu mpe kukondwa lukwikilu; kasi muntu mosi ve, beno me mona, mu—mu me sala yawu ve. Beto kele—beto kele bampangi ya babakala mpe bampangi ya bakento, na kusalaka kingolongo, beto ke na kukulumuka na kisika Mpangi-kento Florence kwisaka mazono na suka, beno me mona. Yandi . . . Beto—beto

fwana kwisa mutindu yina. Mpe ya kele ve dibanza ya munu samu—samu na kumeka na kusawula mpangi-bakala to mpangi-kento yina ke wisana na beno ve. Ve, dibanza ya mutindu yina kuvwanda ntama ya munu! Mu ke banza ve ti mu ke mona bande yina mu bokilaka nkumbu ya muntu mosi. Na yina, mu me mona ti na bantangu mingi muntu salaka yimbi, kasi ya kele kati-kati ya bawu na Nzambi. Kasi yina kele yimbi, na mutindu ya disumu mpe. . . Mpe kubakula yimbi na bantangu yankaka kele kaka disumu ve, kasi ya kele kaka kubakula yimbi ya bantu. Mpe mu—mu ke banza mosi na msoi ya beto kele na muswa ya kutuba landila lubakusu ya beto.

⁵⁸ Ntangu yayi Kiyidiki yayi ya nene tulaka mwana ya Yandi yina Yandi vangaka. Ntangu yayi, Adam vwandaka mwana ya Yandi ya ntete. Yesu vwandaka Mwana ya Yandi mosi kaka *butukaka*, beno me mona, Yandi butukaka na kento. Kasi Adam vwandaka kaka mbala mosi na diboko ya Nzambi, na luvangu.

⁵⁹ Ntangu yayi quartier général, na mwana ya Yandi—ya Yandi mpe kento ya mwana ya Yandi na zulu ya nionso, ya monanaka ya kulunga mingi. Ya vwandaka na muntu mosi, mfumu ya nionso, mwana ya Yandi Mosi mpe kento ya yandi.

⁶⁰ Mpe nkuna nionso vwandaka ya kulunga, maba, mpe bachêne, mpe matiti, mpe bandeke, mpe baniama. Mpe bima nionso vwandaka na ndonga ya kulunga na Musiku ya Nzambi, “Beno soba ve nkadulu ya beno. Beno buta landila mutindu ya yawu, konso nkuna! Chêne, kusoba ata fioti ve na yinti ya payi-payi.” Beno me mona? “Diba, kusoba ve na kima yankaka. Kasi konso nkuna kulandila mutindu ya yawu!” Mpe Yandi vwandaka—Yandi vwandaka tala yawu na kati ya bantangu.

⁶¹ Mpe Yandi tubaka Ndinga. Mpe Ngolo ya Yandi ya nene ya luvangu salaka bima yayi ke monana, ata mpe bakala mpe kento. Mpe ba vwandaka bamfumu samu ba vwandaka. . . ba vwandaka ya kulutula bima yankaka nionso. Mpe Yandi tulaka bawu mpe na nsi ya lukengolo ya mutindu mosi yina Yandi tulaka bayinti, baniama, mpe nionso yina: Ndinga ya Yandi. Bawu fwana ata fioti ve, na mutindu mosi ve, kubuka Ndinga yina. Bawu fwana vwanda Kuna. “Beno katula ata fioti ve kima mosi na Yawu, to kuyika kima mosi na Yawu! Beno fwana zinga na nzila ya Ndinga yayi.”

⁶² Mpe ntangu nionso luvangu yina zolaka zinga mutindu yina, Mpangi-kento Shakarian zolaka ve kukwenda na suka yayi, ntangu nionso ya zolaka vwanda mutindu yina, économie ya nene ya Nzambi! Yawu yina beto ke kwikila ti beto ke vutuka. Beto ke na kuvutuka na kifulu yango, kisika yango.

⁶³ Kisika na suka yina ya sambanu, ntangu Nzambi talaka yawu nionso, mpe Yandi tubaka, “Ya kele mbote. Mu—Mu me sepela na yawu. Yinga, Mu—Mu—Mu me sepela ti Mu me sala yawu. Mpe ya kele nionso ntangu yayi na nsi ya luyalu. Mpe

mu fwana tula kivuvu na mwana ya Munu mpe na kento ya yandi, ti—ti ba ke (sala bawu mfumu ya nionso ya yawu), ti ba ke tala yawu nionso mpe ke mona ti ya kele nionso mbote, ti bima nionso ke buta landila mutindu ya yawu. Ntangu yayi yandi kele na ngolo ya kusala yawu.” Nzambi na yina tubaka, “Mbote, kana ya kele nionso mbote mingi, mpe ya lenda vwanda kima yankaka ve, samu ya kele nsatu ya Munu Mosi. Ya kele mutindu yina mu ke zola yawu. Mpe mu tubaka yawu mutindu yina, mpe Bandinga ya Munu me nata yawu kaka kieleka mutindu mu zolaka yawu. Mpe yawu yina. Ya kele mbote mingi!” Na yina Biblia me tuba, “Nzambi pemaka kilumbu ya sambanu, na bisalu ya Yandi nionso.”

⁶⁴ Mpe bima nionso na nsi ya luyalu, samu na kubuta na mutindu ya yawu. Ntangu yayi beno bambuka moyo, “kubuta.” Ntangu Yandi tulaka nkuna na ntoto, nkuna lendaka kaka kubuta na ngolo ya luzingu yina kele na kati ya yawu, samu na kusoba yawu nkuna na kimenina, to nionso yina ya vwandaka. Ngolo ya Yandi ya kusoba! Ntangu yayi, Nzambi tulaka nkuna na kati kuna, na makuki yina ya zolaka vwanda yina Yandi tubaka ti ya ke vwanda. Mpe ntangu nionso ya vwandaka kaka na ndonga ya yawu, ya zolaka vwanda kaka kieleka yina Nzambi tubaka ya ke vwanda. Ya zolaka vwanda mutindu yina, samu Yandi salaka yawu mutindu yina, mpe salaka kanale mosi. Ti, kima nionso yina ke bikala na kanale ya Yandi, na ndonga ya Yandi ya Ndinga, ya ke buta kieleka mutindu Ndinga ya Yandi tubaka ya ke sala. Ya lendaka ve kukatuka kuna. Ya ke tambula kaka kieleka mbote. Na yina, na bima nionso na kivuvu na mwana ya Yandi Mosi, ti ya ke vwanda mutindu yina, na yina Nzambi tubaka, “Ya kele mbote mingi, na yina Mu ke pema kaka. Mpe mosi na mosi ya bankuna yina kele na ngolo na kati ya yawu, samu na kusoba yawu mosi na mutindu yina Mu ke zola yawu vwanda. Yawu yina ya fwana vwanda, samu Mu me pesa na konso nkuna ngolo ya kusoba, samu na kubasisa na yawu mosi, na kati ya makuki ya yawu ntangu yayi samu na kubasisa na yawu mosi kieleka yina mu ke zola yawu kuvwanda.”

⁶⁵ Nzambi me sobaka ata fioti ve. Yandi kele kaka mutindu mosi mutindu Yandi vwandaka kuna! Nzambi me baka lukanu ya kusala kima mosi. Yandi ke sala yawu. Kima mosi ve ke kanga Yandi nzila. Yandi ke sala yawu!

⁶⁶ Ntangu yayi na manima ya me kuma nionso mbote mingi mpe na ndonga, Nzambi ndimaka kieleka ntangu yayi ti yayi ke vwanda nionso mbote mingi, na manima, ntangu Yandi salaka yawu, na manima mbeni kwisaka. Mu ke . . . Nzambi pesaka ngolo samu na kusoba. Mpe mu ke bokila mpangi yayi, na ngolo samu na ku—kuvanga diaka ve, kasi Mu ke . . . Yandi vwandaka na ngolo ya kutengama, ya kusoba ve; kasi ya kutengama. Ntangu yayi, kima nionso ya kutengama me katuka na mutindu

ya yawu ya kieleka, ya kele na kima mosi ve me tambula mbote ve na yawu.

⁶⁷ Mwa bamvula me luta, na kukengidila, mu vwandaka luta na bilanga ya masangu, mu ke banza, ya vwandaka na divala mosi katukaka na yinti, mpe yawu kubwaka na zulu ya mwinga ya disangu. Mpe mwinga vwanda meka na mutindu nionso na kutelama mutindu ya zolaka vwanda, kasi yawu kutengamaka samu ti kima mosi salamaka. Mpe kitini ya yinti vwandaka me lala na zulu ya yawu.

⁶⁸ Na yina beto monaka nsinga ya mfinda na kati ya kilanga. Na yina, mingi na kati ya beno babakala awa, mpe ntangu yankaka mingi ya beno bakento. . . kana beno me katuka na Kentucky. Bakento ke sadilaka nsengo kuna mutindu mosi na babakala, samu na kukatula yawu na kilanga na—na nsengo, yina beto ke bokilaka nsengo ya nkingu ya dibata, mpe ke katula bansinga ya mfinda. Samu, kana beno me katula ve bansinga yina ya mfinda, kisika disangu vwandaka na ndonga, mutindu *yayi*, na yina nsinga yina ya mfinda ke mata mingi, ya ke kanga disangu yina, mpe ya ke ziunga yawu malembe-malembe, na malembe mingi, na kinsweki nionso, ti beno lendaka na mpasi kutuba ti ba me ziunga yawu. Mpe na nsuka ya ke kuma ngolo mingi mpe ngolo mingi, mpe ya ke benda disangu yina tii ya ke tengama. Ya ke benda yawu pene-pene ya yawu, ke ziunga pene-pene ya vinu ya yawu; samu na kutengika yawu na yina ya vwandaka, samu na kima yankaka. Kasi ya kele disangu, kasi ya kele disangu ya kutengama.

⁶⁹ Mpe beto nionso kele kaka na kifwani ya Nzambi. Kasi bayankaka kele kieleka ya kutengama, mutindu bana ya Nzambi, yina ke tambula kuswaswana na Ndinga ya Yandi mpe na mutindu yina—yina Yandi kuzwaka beto mpe salaka samu na beto na kutambula. Kutula kima mosi, yinza ke basisa beto na nzila, ke benda beto pene-pene ya yawu, mpe ntama na nzila yina ya kusungama, ya fioti yina Yandi tulaka beto, samu na kuvwanda bana-babakala mpe bana-bakento ya Nzambi. Disumu salaka diambu yayi ya yimbi na bana-bakala mpe bana-bakento ya Nzambi.

⁷⁰ Mubebisi! Mu zaba ti ya ke monana kaka ya ngitukulu samu na kutubila yawu mutindu yayi, “ku—kutengika,” kasi yawu yina ya vwandaka; yandi tengikaka, to bebisaka. *Kubebisa* zola kutuba “yina ba me soba, yina ba me sala kima ya kuswaswana.” Mpe *kutengika* kele kima ya mutindu mosi, yina ba me nata yawu mpe ba me tengika yawu, mpe “yina ba me sala mutindu yankaka.” Kasi ya kele kaka nkuna yina mosi, kasi ya me tengama.

⁷¹ Ntangu yayi beto ke mona ti mubebisi yayi me kuzwa kitezo ya ntangu ya mutindu mosi, samu na kutengika, mutindu Nzambi lenda kusoba. Ntangu yayi yandi kunaka nkuna ya

yandi, to, kunaka ata fioti ve nkuna ya yandi, yandi...na disamba ya Eden. Kubanda ntangu yina, yandi me kuzwa bamvula mafunda sambanu ya kutengika Nkuna ya Nzambi, Ndinga ya Nzambi; samu na kutengika Yawu, kusala Yawu kima ya kuswaswana; ntangu yandi...ntangu ya ntete yina Eve kuwaka yandi, mpe yandi kuzwaka mwa nsasa mosi ya fioti.

⁷² Beno bambuka moyo, ntete Satana tangaka Disonuku yina kaka mbote-mbote mutindu ya lendaka vwanda, “Nzambi tubaka yawu, ‘Beno ke kudia ve bayinti nionso kele na kati ya disamba ya Eden?’” Beno me mona? “Beno ke kudia ve bayinti nionso?”

⁷³ Mpe beno bambuka moyo ntangu yayi, Eve tubaka, “Yinga, beto lenda kudia bayinti nionso; kasi yinti yina kele na kati-kati ya disamba, beto fwana ata kusimba yawu ve.” Ntangu yayi beno tala yandi, na nsangu ya yandi, yandi tengamisaka Ndinga yina fioti. Na kutuba...Eve tubaka, “Samu Nzambi tubaka, ti, kana beto kudia yawu, kilumbu yina beto ke ‘kufwa.’”

⁷⁴ Yandi tubaka, “Oh, ya kieleka beno ke kufwa ve.” Beno me mona, yandi vwandaka muntu, yandi tubaka, “Beno—beno—beno sala yawu ntangu yayi. Mpe, beno—beno kele—beno kele mutindu ya bantu yina me zaba kima mosi ve. Beno, ya kieleka, beno me zaba bima nionso ve. Kasi kana beno kudia yawu kaka, na manima beno ke vwanda na ndwenga, beno ke vwanda na luzabu. Beno ke zaba kieleka na yimbi mpe beno ke vwanda mutindu banzambi, beno, kana beno ke kudia kaka ndwenga yayi mu kele na yawu. Mu me zaba, kasi beno ve.”

⁷⁵ Na yina, ya kele mbote mingi na kuvwanda na ndwenga. Kasi kana ndwenga kele ya kuswaswana, kana ndwenga kele ve ndwenga ya kieleka me katuka na Nzambi, ndwenga ya Kinzambi, mpe ya me kuma ndwenga ya kimuntu; mu ke kipe ve wapi mutindu science beto kele na yawu, mpe yinki-diaka, to malongi, ya kele ya diabulu. Mu ke siamisa yawu na beno, kana Mfumu kuzola, na mwa minuti fioti. Ya kele ya diabulu.

⁷⁶ Civilisation kele ya diabulu. Mu me katuka na kulonga na zulu ya yawu. Bazingilu nionso na zulu ya ntoto, bangolo nionso ya science, mpe bima nionso, kele ya diabulu. Ya kele nsangu ya yandi ya mbote yandi ke longakaka, ya luzabu, na disamba ya Eden. Mpe yandi bakaka luzabu yina, luzabu ya kubeba, ya kuswaswana na Ndinga mpe luzolo mpe manaka ya Nzambi. Mpe ntangu yayi yandi me kuzwa bamvula mafunda sambanu samu na kusala kaka kieleka yina Nzambi salaka, kaka na mutindu ya kubeba, mpe yandi bakaka kitezo ya ntangu ya mutindu mosi samu na kukotisa Eden ya yandi. Ntangu yayi yandi me kuzwa Eden mosi awa na zulu ya ntoto, mpe ya me fuluka na ndwenga, luzabu. Yina vwandaka nsangu ya yandi ya mbote na mbandukulu, luzabu, ndwenga, science. Nzambi ata fioti ve ke kipe yina. Mpe mu—mu ke zola beno tala mbote muniti

mosi. Yandi salaka yayi, mpe samu ti ya vwandaka muntu ya ndwenga ya yinza.

⁷⁷ Ntangu yayi, ya kele mpasi na kutuba yayi. Ya kele—ya kele mpasi mingi, samu mu ke na kutuba na bantu yina kele na kuwa mutindu mosi na munu, mpe mutindu mu vwandaka bamvula mingi me luta. Kasi kubanda kuzibuka ya Bidimbu Sambwadi yina, ya Bawanzio yina kwisaka kuna na manima ya mongo kuna, *Yayi* me kuma Buku ya malu-malu. Ya kele bima yina bumbamaka, ya me monisama pwelele mutindu Nzambi silaka na Apocalypse 10, Yandi ke sala yawu. Mpe beto kele bantu ya bweso yina Nzambi me soola, ya ntoto, ti beto fwana mona mpe kubakula bima yayi; yina kele ve mwa masolo ya luvunu, mabanza ya nsuni ke meka na kutelemisa yawu. Ya kele Ndinga ya Nzambi me monisama, me siamisama, ti Ya kele kieleka. Me siamisama, na science ve; kasi na Nzambi, ti Ya kele kieleka. Nzambi, mutindu mu tubaka na ntwala na nsangu mosi, Nzambi kele na nsatu ve ti muntu mosi kutendula Ndinga ya Yandi. Yandi kele Mutendudi ya Yandi Mosi. Yandi ke tuba ti ya ke salama, mpe ya ke salama. Ya zola kutuba, Yandi—Yandi ke siamisa yawu, yina Yandi ke tendula yawu.

⁷⁸ Mwa bamvula fioti me luta ntangu, beto ba-pentecotiste, ntangu mabuundu yankaka tubaka na beto ti beto vwandaka “bilawu,” beto “lendaka ve, Mpeve-Santu vwandaka kima yina me luta.” Kasi beto me mona ti Nsilulu ya Nzambi vwandaka samu na yina nionso me zola, mpe ntangu yayi beto zaba luswaswanu. Beno me mona, mpe ya kele kaka malembe malembe, kima yayi me zibuka.

⁷⁹ Mpe ntangu yayi Yandi silaka ti mansweki yina bumbamaka na kati kuna, na bansungi nionso ya dibuundu, ke monisama kaka na ntangu ya nsuka. Mpe Yandi me bika beto zaba ntangu yayi. Beto kele na ntangu ya nsuka. Beto kele awa ntangu yayi.

⁸⁰ Ntangu yayi, Satana kele mfumu ya civilisation. Yandi kele mfumu ya science. Yandi kele mfumu ya ndongosolo.

Beno ke tuba, “Ya kele kieleka?”

⁸¹ Mbote mingi, beto tanga na Ndinga ya Nzambi ntangu yayi, Genèse 4, mpe beto vtutuka na manima mpe beto tala kaka minuti. Mu zaba ti ntangu yankaka mu. . . Kana mu ke baka ntangu ya yinda, Mpangi Carl kieleka ke tuba na munu. Kasi, na Genèse, kapu 4, mpe nzila ya 16, ke kwenya na ntwala na kutubaka awa, na mbandukulu, yina Nzambi salaka, samu na kutula nsingulu na zulu ya bakala mpe kento, mpe nionso yina ba zolaka kusala; mpe ya kele ve *nsingilu* na zulu ya bawu, kasi kutuba na bawu yina ke salama, mpe kusinga ntoto samu na zola ya Adam. Mpe beto ke mona ti awa ntangu yayi, ti Eve vwandaka na mapasa. Mpe mosi ya bawu vwandaka ya Satana, mpe mosi yankaka vwandaka ya Nzambi.

Ntangu yayi beno ke tuba, “Uh-oh! Ve. Ntangu yayi, Mpangi Branham!”

⁸² Beno vingila fioti. Beno pesa munu Disonuku mosi, kisika, ya me tuba ti Cain vwandaka mwana ya Adam. Mu ke talisa na beno na kati ya Masonuku kisika Ya me tuba, “Cain vwandaka ya mwana ya diabulu,” ya Adam ve.

⁸³ Ntangu yayi beno tala ntangu yandi bakaka kivumu awa. Beto banda na kapu 4, ntete.

Mpe Adam zabaka . . . kento ya yandi; mpe kumaka na kivumu, mpe butuka Cain, mpe tubaka, mu me kuzwa . . . yandi tubaka ntangu yayi, mu me kuzwa mwana na Mfumu.

⁸⁴ Samu, ya zolaka vwanda. Ata ti kana ya vwandaka kento ya kindumba to konso kima yina, ya zolaka katuka na Nzambi, beno me mona, samu ya kele nkuna ya Yandi, ya kele musiku ya nkuna ya Yandi, ya fwana buta ata ti ya kele nkuna ya kupola, nkuna ya kubeba, to nionso yina ya kele. Ya fwana buta, kaka. Ya kele ntumunu ya Yandi.

Mpe yandi butaka diaka mpangi ya yandi Abel.

⁸⁵ Mu zabaka yandi diaka ve. Adam zabaka kento ya yandi, mpe yandi butaka Cain mpe yandi butaka diaka Abel, mapasa. Satana vwandaka na yandi na suka yina, Adam na manima ya midi.

⁸⁶ Beno ke mona kuswana ya nene na zulunale awa, mu ke banza, na Tucson ntangu yayi, ya kento yina me buta mwana ya ndombe mpe mwana ya mundele, na ntangu mosi. Yandi zingaka na bakala ya yandi na suka yina, mpe bakala yina na manima ya midi. Mpe bakala ke zola kukeba . . . bakala ya mundele tubaka ti yandi ke keba mwana ya yandi mosi, kasi bakala ya ndombe zolaka kukeba mwana ya yandi mosi. Beno me mona? Mu zaba ti, na kuvukisa banzutu ya bayimbwa mpe nionso yina, ya kieleka ya ke salama, kana ya kele na bangunga fioti na manima ya yina. Yayi ke siamisa yawu.

⁸⁷ Ntangu yayi samu na kutalisa kisika civilisation me katuka, ntangu yayi beto tanga na Genèse awa, na kapu 4 ya Genèse diaka, mpe kumona kisika yango. Nzila ya 16.

Mpe Cain kwendaka ntama ya mwandulu ya Nzambi, mpe kwendaka zinga na ntoto ya Nod, na lweka ya este ya Eden.

Mpe Cain zabaka kento ya yandi; mpe yandi kumaka na kivumu, mpe yandi butaka Enoch: mpe yandi tungaka mbanza mosi, mpe bokilaka nkumbu ya mbanza, na manima . . . mwana ya yandi ya bakala, Enoch.

⁸⁸ Civilisation bandaka. Docteur Scofield, awa na kati ya Biblia ya munu Scofield, ya me tuba, “Civilisation ya ntete.”

Beno tala, na manima yandi butaka bana ya babakala, mpe ba salaka ba-orgue mpe musiki. Yina yankaka butaka bana ya babakala, mpe yandi bandaka na kusala bima yankaka, mambu ya ngitukulu, kutunga bambanza, mpe—mpe kusala bisadilu ya kisengo, mpe bima ya mutindu na mutindu. Beno me mona, yawu yina yandi salaka, ya kumaka civilisation ya ntete, yina vwandaka ki-Caïn. Yandi me sala kima mosi na kati ya bansungi.

⁸⁹ Ntangu yayi beto kwenda kuna na nzila ya 25, mpe beno tala yina me landa vwandaka.

Mpe Adam zabaka kento ya yandi, ntangu yayi, mpe yandi butaka mwana ya bakala, mpe bokilaka yandi Seth: Samu Nzambi, yandi tubaka, me pesa munu nkuna yankaka na kisika ya Abel yina Caïn kufwaka.

Mpe Seth... Mpe na Seth, na yandi diaka mwana butukaka; mpe yandi bokilaka yandi Enos: mpe na manima bantu bandaka na kubokila nkumbu ya MFUMU (kuna na lweka ya Seth, na lweka ya bantu ya Caïn ve).

⁹⁰ Beno me mona, muntu yina ya nene ya ngangu yina beto nionso me tubila mingi! Yina kele communisme bubu yayi, yina kele nzambi ya bawu? Ya kele ngangu, science. Yinki beto ke sala, na mutindu nionso? Wapi kisika beto ke na kuzinga? Beno simba bampova yayi bubu yayi.

⁹¹ Ntangu yayi yandi ke na mutindu ya yandi ya Eden, Satana ke sala ntangu yayi. Na bamvula mafunda sambanu, yandi me sala (vangaka ve), kasi, me tengika ntoto ya muvimba ya Nzambi, bivangu ya Yandi, baniamama, kuvukisa bankuna, kuvukisa bankuna ya luswaswanu; bayinti, bimenina, bantu; ata mpe nsambulu, Biblia, dibuundu; tii yandi me kuzwa yandi mosi disamba ya Eden ya muvimba, ya science, bima nionso ke tambula na science. Batomabilu ya beto, bima nionso yina beto ke na yawu, me pesama na beto na nzila ya science, yina muntu me sala. Mpe yandi me kuzwa Eden ya yandi ya nene awa; samu na kusiamisa ti Nsangu kele na ntangu ya kieleka, samu na kusiamisa ti ya kele ve mwa nsungi yankaka kasi Apocalypse 10! Beno tala kuvukisa bankuna ya luswaswanu bubu yayi, samu na kusala ya kulutula mbote, to, ya kulutula kitoko, ya kulutula mbote ve. Beno tala bana ya fioti bubu yayi.

⁹² Mu nataka mwana ya munu ya kento na dentiste, mazono, mpe yandi tubaka ti meno ya yandi vwandaka tengama. Mpangi-bakala mosi kuna na Tucson, Mpangi Norman, vwandaka na mwana ya yandi ya fioti ya kento, mpe meno ya yandi vwandaka basika na nganda. Mpe dentiste tubaka na mbala mosi, yandi ke kwikila, ti ntangu yankaka na bantangu ke kwisa, ti bantu ke butuka, meno ya kumena na mutindu nionso. Ya kele madia ti beto ke na kudia, madia ya kuvukisa.

⁹³ Beno me tanga *Reader's Digest*, ngonda me luta, samu na Billy Graham, évangéliste ya lukumu? Beno me kuwa yandi? Mu ke sambila samu na yandi ntangu yayi kulutula ntangu me luta. Ntangu yandi tubaka na ba-col yina ya kubalula, mpe nionso yina, na nkokila yina, kutula yawu na zulu ya nganga-Nzambi yina. Kima mosi me salama na yandi. Mosi ya bilumbu yayi, mu banza yandi ke mona kisika yina yandi kele, beno tala, ntangu yayi ba ke bokila yandi na sodome, mbanza yina ya kubeba. Mpe ntangu yayi beno tala yayi na *Reader's Digest*, Billy me lemba mingi ti yandi lendaka ve kusala balukutakanu ya yandi. Mpe ba tubaka na yandi ti yandi fwana kima mbangu, kusala ngalasisse, mpe nionso yina. Na yina yandi ke kima mbangu kilometre mosi konso kilumbu, mu ke kwikila mutindu yina, to kima mosi, samu na kusala ngalasisse.

⁹⁴ Muntu me kupola. Dikanda nionso ya bantu me kubeba. Bima nionso me kuma mutindu ya vwandaka na ntangu ya kubeba ya yinza na masa. Ya me kuma ya muvimba na kidi-kidi, ya kubalula, kuswaswana na ndonga ya mbote yina Nzambi tulaka bawu. Disumu, na nzila ya science mpe lukusu, me nata na lweka dikanda ya muvimba ya bantu.

⁹⁵ Beno me tangaka diaka na nsi ya zulunale yina, kisika ya me tuba, “Na bilumbu yayi, ti bana-bakento mpe bana-babakala kele na mvula ya bawu ya kati-kati, landila mutindu ya nzutu, kati-kati ya bamvula makumi zole mpe makumi zole na tanu?” Beno banza yawu.

⁹⁶ Na kuswasikisa mabanza na nkokila yina, mu bakaka mwana-kento mosi ya bamvula makumi zole na zole, yina me luta ntangu ya kubuta, mu bokilaka yandi kuna. Mpe yawu yina dokotolo ya yandi tubaka na yandi.

⁹⁷ Beno me mona, ya kele dikanda ya kubeba ya kubwa, ya yimbi mingi, ya kukangama na difelo. Mu zaba ti ya ke wakana ya bumuntu ve, kasi ya kele Biblia, beno me mona, ya kele kieleka; mpe dikanda yayi yina beto ke na kuzinga, nsungi yayi ya bantu.

⁹⁸ Ntangu yayi beno tala bubu yayi, kuvukisa bitwisi, kuvukisa bayinti; mpe science me vutuka na mbala mosi, science ya mutindu mosi ke sala yawu, ya ke tuba, “Yawu yina ke na kubebisa dikanda ya muvimba ya bantu.” Beno me tanga yawu mutindu mosi na munu. Mbote, samu na yinki ba ke sukisa yawu ve? Ya kele samu ba lenda ve kusukisa yawu. Ndinga ya Nzambi me tuba ti ya ke vwanza mutindu yina. Kasi kana ba ke banza na mwa ntangu fioti, ba kele bisadilu, mutindu Judas Iscariot, na kutulaka kieleka kima yina Nzambi tubaka ke salama. Ya ke na kusala yawu kaka kieleka na zulu ya lufulu ya bawu ya science.

⁹⁹ Na nzila ya kusosa-sosa ya bawu ya science, na mutindu yina mosi yandi vunaka Eve, yandi me vuna diaka dibuundu, yina kuna Eve vwanza mbandu mosi. Ntangu yayi, ntangu

yayi, Adam mbandu mosi kuna diaka, to Eve, mu zola tuba, ya dibuundu, beno tala yina ya salaka. Na nzila ya kuyenga-yenga samu na luzabu, yandi me luta ndilulu kati-kati ya mbote mpe yimbi, na kuwaka kubeba ya Satana, to kutengama, ya Ndinga ya Nzambi ya kieleka.

¹⁰⁰ Mpe ntangu yayi mabuundu bubu yayi me kuma ya kutengama. Ntangu yayi mu ke tubila bantu ve, bantu. Mu ke tubila dibuundu ya yinza. Mosi me tengama na lweka mosi, mpe mosi me tengama na lweka yankaka, mpe, na nzila ya science. Mutindu yina yandi salaka. Yandi me tula ntitisa ya yandi, Satana, na Esaie 14:12.

¹⁰¹ Beto tanga yawu na mwa ntangu fioti. Na Buku ya Esaie, beto banda na kapu ya 14, nzila ya 12.

*Tala nge me kubwa na zulu, O Lucifer, mwana ya suka!
tala ba me losa nge na ntoto, yina me lembisa bayinsi!*

Yayi kele Esaie me mona yandi na vision, beno me mona, na nsungi yina ke kwisa.

*Samu nge me tuba na kati ya ntima ya nge, mu
ke tomboka na zulu, mu ke zangula kiti ya munu
ya kimfumu na zulu ya bambwetete ya Nzambi: Mu
ke vwanda diaka na zulu ya mongo ya dibuundu, . . .
balweka na nord:*

¹⁰² Lukanu ya Satana, kubanda na Eden, vwandaka kusala Eden ya yandi mosi; mpe kukizangula yandi mosi na zulu, na yina bambwetete ya Nzambi ke sambila yandi, bana ke sambila yandi. Mpe yandi me sala yawu ya kieleka ntangu yayi, mpe na yina yandi me sala yawu mpe yandi me kotisa yawu na dibuundu. Na yina, mu ke kwenda ve na bitini-bitini. Beno yina ke kuwaka ba bande me zaba yawu. Ya—ya kele kieleka ngunga yayi beto ke na kuzinga, mpe ya kele Satana yina me sala yawu na nzila manaka ya malongi, ya kuyidika mbote mingi, yayi ya mbote mingi, yina ya mbote mingi. Mpe kukondwa kuzaba, ntangu nionso, ba ke kwenda kaka na lufwa. Bampofu, ke twadisa bampofu, bantwadisi ya bampofu ya bayinsi, bantwadisi ya bampofu ya science, bantwadisi ya bampofu ya dibuundu, bampofu ke twadisa bampofu. Yesu tubaka, “Beni bika bawu, bawu zole ke kubwa na dibulu.”

¹⁰³ Beni tala awa kifwani ya ba-Eden zole ya kukangama mingi kintwadi, ti ya lendaka vuna Muponami. Matthieu 24:24 me tuba ti ya ke vwanda mutindu yina. Kasi mu ke zola ti beto sukisa na mwa ntangu fioti mpe beto tala ba-Eden yayi zole, mpe kima mosi mingi-mingi, wapi mutindu Biblia me tuba ti Ndinga ya Nzambi salaka Eden yina, mpe wapi mutindu Ndinga ya Nzambi ke keba beto na Eden yina yankaka ke kwisa.

¹⁰⁴ Ntangu yayi, beto zaba diaka ti ya fwana vwanda na Eden yankaka, kana beto ke kuwa diaka profete, Paul, na ba-

Thessalonicien ya Zole kapu 2. Mu lenda tanga Yawu kana beno me zola.

Yandi yina ke kukizangula yandi mosi; *kilumbu yina ke kwisa ve*, ya Mfumu, tii *muntu yina ya disumu ke monana pwelele*, . . .

. . .yandi yina me vwanda na kati ya tempelo ya Nzambi, na kukizangulaka *yandi mosi na zulu ya yina nionso ba me bokila Nzambi*, samu ti yandi mutindu Nzambi ba ke sambila yandi mutindu Nzambi.

105 Beno banza na yawu! Ntangu yayi Esaie 14, profete me tuba ti yandi monaka “lucifer, na kati ya ntima ya yandi,” na nzila ya vision na nsi ya lutwadusu ya Nzambi, “na kutubaka ti yandi ke sala yawu.” Na Esaie, bamvula nkama nana na ntwala Paul, to pene-pene na yina.

106 Ntangu yayi awa, bamvula bankama nana na manima, Paul monaka yandi, ke kwisa na kisika ya yandi. Beno tala, ya ke mata, Eden ya yandi; Eden ya yandi ya science, na yinza ya yandi ya science, na kento ya dibala ya dibuundu ya science, nionso na nsi ya mpova ya “luzabu,” ba-seminere ya nene, ba-diplome ya nene, manaka ya malongi.

107 Beno kuwa, mpangi-bakala, mpangi-kento, beto nionso ke tambula na nzila yina Florence me tambula. Mu ke yufula beno, na Nkumbu ya Yesu, na kutadila Yayi. Kutadila ve na munu. Mu kele mpangi ya beno ya bakala. Ya—ya kele ve yawu. Beno tadila Ndinga yina mu ke tuba, ya Biblia ya Nzambi. Mpe beno tala kuna, ya me siamisama na mutindu ya kulunga na Ndinga Mosi ya Nzambi, na nsungi yina beto ke na kuzinga, kisika beto kele.

108 Bamanaka yayi kele kieleka ya mbeni ya Klisto, na kati ya yawu mosi. Ntangu yayi, yandi fwana vwanda na Eden, yandi tubaka ti yandi ke sala yawu. Awa Ndinga ya Nzambi me tuba ti yandi ke sala yawu, mpe awa beto ke tala kaka kuna mpe beto ke mona yandi ke sala yawu. Yandi me sala yawu na kento ya yandi ya makwela ya ngangu, ya science, ya denomination. Yandi ke baka luyalu, mosi ya bilumbu yayi, na Conseil Mondial ya Mabuundu yina ba ke tula. Nionso ke vwanda na yandi.

109 Na kumekaka bantu, ya kele ve samu bawu kele bantu ya yimbi; ba kunaka bawu na ndonga yina ya kusungama, mutindu disangu, kasi Satana kunaka bansinga ya mfinda, yina ba me bokila science, kusosa-sosa, kulonguka, ba-diplome ya doctorat. Na ntangu mosi ba ke bika beno ve na chaire kana beno kele ve na diplome ya doctorat ya seminere mosi kuna. Ya kele nionso yimbi! Ya kele bantu ve; ya kele manaka yina kele yimbi. Mpe ntangu yayi yinki ya me sala? Yawu nionso me mata diaka, mpe me nata yinza ya muvimba (na kati ya nkonga ya kuvukisa bankuna, kubeba ya Nkuna ya Nzambi ya kieleka) na kawo yankaka ya mudidi.

110 Kasi mu ke na kiese mingi ti Nzambi me banza na beto diaka, ti Yandi lenda kaka kutambula na zulu ya kizizi ya mutindu yina. Yandi silaka ti Yandi ke sala yawu, mpe ke bokila mwa dikábu ya fioti yina ke vwanda Kento ya Yandi ya makwela.

111 Beno tala awa diaka ntangu yayi, wapi mutindu ya kele ya kulunga mbandu ya mabuundu yayi, to ba-Eden yayi.

112 Nzambi, na nzila ya Nkuna ya Ndinga ya Yandi! Mpe ya kele kaka na kima mosi yina lenda zingisa Ndinga, mpe ya kele Mpeve, samu Ya kele Mupesi-Luzingu na Ndinga. Mpe ntangu Luzingu na kati ya Ndinga me kutana na Luzingu ya Mpeve, Ya ke buta nionso yina Nkuna kele.

113 Ntangu yayi beno tala yina me salama. Na disamba ya Eden vwandaka économie ya kukondwa kuzaba diambu ya Nzambi, mpe yina vwandaka mosi ya bansungi. Nsuni ya ntete vwandaka zaba diambu ve, bantu zabaka disumu ve. Ba zabaka ve kima mosi samu na disumu. Bawu zole Adam na Eve vwandaka kinkonga, kasi ba vwandaka zaba ve kinkonga ya bawu, na mpeve mosi vwandaka fika kizizi ya bawu. Bawu zabaka ata fioti ve ti bawu vwandaka kinkonga, na nionso, samu ba vwandaka ya kubumba. Samu, vwale ya Nzambi vwandaka na kati ya mabanza ya bawu, bawu zabaka ve yina mbote mpe yimbi vwandaka. Mpe bawu zole vwandaka me telema kuna kinkonga, ba me talisa ti luzabu vwandaka me kwisa ntete na bawu ve, beno me mona, ti ba vwandaka kinkonga. Bawu zole vwandaka kinkonga mpe ba zabaka yawu ve.

114 Ntangu yayi kana beno ke baka, kana beno me zola, to kusonika yawu, na Apocalypse, kapu ya 3. Mpeve-Santu zabisaka na ntuala nsungi yayi ya nsuka, na Nsungi ya Dibundu ya Pentecote ya Laodicée na bilumbu ya nsuka, Yandi tubaka, “Nge kele kinkonga, mpe mpofo, mpe nge zaba yawu ve.”

115 Ya kele na Nkuna ya Nzambi, na nsi ya kukondwa kuzaba diambu, kukondwa kuzaba ti ba vwandaka kinkonga, na nsi ya vwale ya Mpeve-Santu, ke fika bawu na disumu.

116 Mpe ntangu yayi na nsungi ya nsuka ya dibundu, beto ke mona awa ti ba kele diaka kinkonga, mpe bawu zaba yawu ve. Kasi ya kele ve vwale ya Mpeve-Santu. Ya kele vwale yina Satana lwatisaka Eve kuna, vwale ya mpusa ya nzutu, vwale ya mpusa ya nzutu. Ba me kuma mvindu mingi ti ba ke zaba ve ti ba kele kinkonga, bakento ya beto na bala-bala, yina me lwata bakupe, ba-robe ya nsoni.

117 Muntu mosi fidisaka na munu kitini mosi na zulunale kilumbu yina, ya robe ya malu-malu yina ba ke lwata, mu banza, ba-centimetre makumi tatu na tanu kubanda na luketo, to kima mosi. Mpe mu ke kukiyufula kana bakento ya beto—ya beto ke bakula ti ya kele vwale ya mpusa ya nzutu?

118 Ntangu yayi beno—beno ke tuba, “Mu lenda siamisa, na ntwala ya Nzambi, ti mu zaba diambu ve samu na pité ya bakala ya munu, to mu—mu . . . nionso yayi.”

119 Kasi kaka, na Lusambusu, ba ke bokila beno “muntu ya pité.” Biblia me tuba mutindu yina. Yesu tubaka, “Yina nionso ke tala kento samu na kulula yandi, me sala dezia pité na yandi na kati ya ntima ya yandi.”

120 “Mpofo, kinkonga, mpe nge zaba yawu ve!” Ya kele ve bamputu ya mwa bakento yina kuna; mu ke na kima mosi ve ya kutelemina bawu. Ya kele diabulu yina! Mpe systeme ya dibuundu ke monana me kubwa na kundima yawu to kutelemina yawu; ya ke bika bawu kuzenga bansuki ya bawu, kutula maquillage, mpe kulwata bakupe, na nkumbu ya Buklisto. Wapi diambu ya kiadi ya kele! Beno me mona, ba kele diaka kinkonga, na Eden ya Satana, mpe ba zaba yawu ve. Ba me zaba yawu ve.

121 Mu ke kwikila mu ke mona, ntangu yankaka, na kutalaka awa, piscine, ti bakento kele kuna na ntangu yayi. Kana kento yina me bakula kaka yina yandi ke na kusala, kasi yandi zaba yawu ve. Yandi kele kinkonga. Nzutu ya yandi kele ya busantu. Yandi ke katula bilele yina Nzambi lwatisaka yandi, na mpusu, samu na nsungi yayi. Yandi ke zenga yawu ntangu nionso. Yandi kele kinkonga, na nsi ya mpova ya “civilisation, malongi ya zulu mingi, civilisation ya mbote mingi, bumuntu ya zulu mingi.” Mu zola ndima ti yayi ke kota mbote-mbote. Ya kele nionso ya diabulu, mpe ya ke bebisama na Nkwizulu ya Mfumu Yesu. Ya ke bebisama, konso kitini ya yawu. Ata kima mosi ve ke bikala.

122 Mpe, oh, nkundi, na kati ya yinsi, mutindu beno ke na kuwa awa na Phoenix, beno banza na bima yayi! Beno kele awa ya kutumama na bawu. Ntangu yayi, Yesu tubaka ti, “Ba ke vuna Musolami kana ya lendaka salama.”

123 Mpeve ya ntete vwandaka . . . vwale ya ntete vwandaka vwale ya santu, Mpeve-Santu, mpe ya zolaka ve kutala na Yawu. Kasi ntangu—ntangu Satana bandaka kutuba na yandi samu na luzabu, yandi zolaka kaka kulosa disu na yinza.

124 Mpe ya kele kieleka yina mwana ya yandi ya kento, dibuundu, me sala. Beno fwana kutala, beno fwana kulwata mutindu mwa ba-star ya cinema, to babakala ya bantwenia fwana kusala mutindu Elvis Presley to—to Pat Boone, to—to mwa bantu yina, na nkumbu ya nsambulu.

125 Pat Boone kele Dibundu ya Klisto. Elvis Presley kele ya Pentecote. Bikalulu zole ya bampeve ya yimbi me losa yinza na kawo ya kulutula yimbi mutindu Judas Iscariot salaka na kuyekula ya Yesu Klisto. Bawu zaba yawu ve. Bana-babakala ya bawu me zaba yawu ve. Mu ke na kima mosi ve ya yimbi samu na bana-babakala yina—yina, bampangi, ya kele mpeve yina ke kindisa yawu.

¹²⁶ Beno zabuka fioti kaka na simu yina, bika nsinga yina ya mfinda kukanga fioti mpusu ya disangu yina, na mwa ntangu fioti, beno tala yina ke salama; disangu me kwenda. Oh, yinga, ya me salama. Mpe ya ke mutindu yina ya ke sala yawu. Ya ke sala yawu ntangu nionso. Eve zolaka kaka kulosa fioti disu na yinza.

¹²⁷ Mpe bika mu tuba na beno kima mosi, mpangi-bakala mpe mpangi-kento. Na Jean ya Ntete, kapu ya 2 mpe nzila ya 15, beto lenda tanga Yawu kana beno me zola, Biblia me tuba:

. . . *Kana beto ke zolaka yinza, to bima ya yinza, ya kele samu zola ya Nzambi kele ve mpe na kati ya beto.*

¹²⁸ Ntangu yayi, yinza kele ve *ntoto*; ya kele mpova ya Grec, kele *kosmos*, zola tuba “ntumunu ya yinza.” Kana beto ke zola bamvwatu ya ntoto, yinza, kana beto ke zola kubendama ya kilumbu yayi, kana beto ke banza “yayi kele ntangu ya mbote mingi, oh, beto kele na bima yayi nionso,” kana beno ke banza yina, ya kele samu dibanza ya beno kele yimbi. Ya me beba na diabulu. “Samu kana beno ke zola ntumunu ya yinza, mpe bima ya yinza yayi, ya kele samu zola ya Nzambi kele ve na kati ya beno.” Beno bambuka yawu. O Nzambi! Beno tala yina beto ke na kumona!

¹²⁹ Awa mu zola sukisa fioti mpe kutuba na beno mwa disolo ya fioti. Mu kuwaka aumônier mosi na Mvita ya Ntete ya Yinza ya muvimba. Ba losaka . . .

¹³⁰ Mutindu Satana na mbandukulu, ntangu yandi kotaka na disamba ya Eden. Yandi lendaka ve kutimuna Bankuna yina. Yandi lendaka ve kubebisa yawu. Kasi yandi mwangaka yawu na ndikila, mpe ya tengikaka Nkuna, ya butaka ve na mutindu ya yawu ya mbote. Ya tengikaka Nkuna ya kieleka.

¹³¹ Mpe ya kele samu na yawu manaka yayi nionso ya nsambulu. Ba kele kaka bana-babakala mpe bana-bakento ya Nzambi, kasi ya kele ya kutengika. Ba ke kwendaka na yinzo-Nzambi, ba ke zola kusala mbote. Masoeur ke kota ata fioti ve na couvent kana ya kele kento ya yimbi. Longi ke kota ata fioti ve na lukolo kana kaka ya kele bakala ya yimbi. Beno ke kota ata fioti ve na dibuundu, mpe kupesa mbote, kutula nkumbu ya beno na buku, to nionso yina beno ke sala na dibuundu ya beno, kana beno kele muntu ya yimbi. Beno ke sala yawu samu na kuvwanda muntu ya mbote. Kasi ya kele lukusu, ya kele kutengama ke sala yawu. Satana me mwangisa yawu. Beno me mona? Nzambi me vwandaka ata fioti ve na organisation. Ya ke na kima ya mutindu yina ve na kati ya Bandinga ya Nzambi.

¹³² Nzambi kele organisation ya beto, beno me sala organisation kati ya Yandi, Nzutu, na kati ya Nzambi, na Mazulu. Ya kele kieleka. Bankumbu ya beto kele na Buku ya Luzingu ya Mwana-dimeme. Beno tala.

¹³³ Kasi, beno me mona, mu zaba ti ya kele kieleka mpasi, kasi mu—mu ke zola ti beno mona mpasi kaka na mwa ntangu

fioti kana beno me zola. Na ntangu ya mvita ya yinza . . . Beno lemvočila munu samu mu me basika na dilongi ya munu.

¹³⁴ Kasi samu na kubasisa dibanza mosi, mu—mu zolaka kupesa beno dibanza samu na yina Satana salaka na Eden: ya mwangisaka ndikila ya yimbi. Beno zola zaba yina vaporisateur yina vwandaka? Mu lenda tuba na beno. Mu kele na formule ya yawu, bampova zole: kukondwa lukwikilu, yina me swaswana na lukwikilu, yandi mwangisaka yawu, kukondwa ntembe. Mpe science me fulusa kisika ya yawu. Kisika mpwasa kele, ya kotaka na Nkuna, Satana fulusaka mpwasa yina na luzabu mpe science mpe civilisation, mpe ya me tengama nionso, luvangu ya muvimba ya Nzambi.

¹³⁵ Mu zaba ti beno ke banza ti mu ke matisa beno na zulu ya divala, kasi mu ke na zulu ya divala na beno. Mpe beno nionso awa ke meka na kumona yina beto lenda sala. Beto ke tuba ve mambu yina samu na kuvwanda ya kuswaswana. Beto fwana vwanda ya kusungama.

¹³⁶ Beto, mosi na mosi, ke kuma na nsuka ya nzila, kisika beto ke pesa mvutu samu na konso ndinga. Kaka na ntangu yayi, beto zaba ti bandinga ya beto. . . . Ntangu beto me butuka, mwa kuboka ya beto ya fioti me kangama na bande. Ya ke bula diaka na Kilumbu ya Lusambusu. Ata mpe bilele yina beno ke lwata ke monana na ntwala ya beno, na Kilumbu ya Lusambusu. Ata mpe science me kuzwa yawu, na nzila ya television. Beno me mona, television ke salaka foto ve, ya ke twadisa yawu kaka. Ntinta ya bilele, ntangu nionso beno ke tambula, mabanza nionso na kati ya dibanza ya beno, kele kaka ya kukangama na bande ya Nzambi. Mpe kima yina ya nene ke vwanda kaka na ntwala ya beno, bilele nionso ya mvindu beno lwataka; ntangu nionso beno kwendaka na kisika ya kuzengisa bansuki, samu na kuzengisa bansuki yina Nzambi pesaka beno. Ya ke salama. Beno ke pesa mvutu samu na yawu. Beno ke ningana ve kuna, ata mpe mabanza ya ntima ya beno na ntangu beno ke sala yawu, ke monisama kaka na ntwala ya beno. Wapi mutindu beno ke tina? “Wapi mutindu beto ke tina kana beto mona mpamba mpulusu ya mutindu yayi?” Beno me mona? Beto ke tina ve. Kuningana nionso, mpe mabanza ya ntima, kele na bande kaka na kitezo yankaka, ata mpe ntinta ya bilele ya beno. Television, television ya kulele ke siamisa yawu kuna, ya ke benda yawu mpe ke taisa yawu, beno me mona, mpe ya kele kaka na kitezo mosi ya tatu na yina beto ke zinga. Beno me mona?

¹³⁷ Ntangu yayi wapi mutindu ndikila me bula dibuundu, me bula ntoto! Ndikila ya Satana na zulu ya Bankuna, me tula bampwasa na kati ya yawu mpe me sala ti ya vwanda ya kutengama. Mingi mpe mingi, ya ke kota na mudindu na kati ya bantima ya mabuundu, mpe na kati ya bantima ya bantu mpe bima nionso, science, science. Tii ya ke kuma kisika yina ya dikanda ya bantu, na nzila ya mvukisa ya bankuna. . . . Mu

ke kwikila ti nkuna nionso ke buta na mutindu ya yawu. Mpe dikanda ya bantu, mpe bimenina, mpe nionso ba me vukisa, ya me nata beto na kisika mosi; na kudiaka madia ya beto ya ntoto, na yina, banzutu ya beto, me sala mvukisa, ya me tula mabanza ya beto nionso. . . Ntangu yayi, kana banzutu ya beto ke na kubwa, kubanda bamvula makumi zole na bamvula makumi zole na tanu, ya kele samu na ba-cellule ya kulemba, na nzila ya madia ya mvukisa, bitomfo ya beto me lemba ve? Ya kele ve ba-cellule, diaka? Yawu yina Ricky ke kima mbangu na balabala awa, na nkawa ya tiya; na yina Ricketta, ba-Elvitta, mpe mingi ya bawu, mutindu beto ke bokila nkumbu, awa ndambu kinkonga na ntwala ya bantu, mabanza me kwenda, ata dibanza ya luzitu to bumuntu kele diaka ve.

¹³⁸ Samu na mwa disolo ya munu. Aumônier yayi tubaka ti yandi vwandaka kuna na lupitalu, mpe tubaka na bana-bakala mingi vwandaka kuna na kati ya tenta, bayankaka. . . Yandi vwandaka me katuka na nganda. Yandi tubaka ti yandi kwendaka kuna, mpe soda mosi tubaka na yandi, yandi tubaka, “Aumônier, beto zola kwenda kuna na zulu ya mpunda, samu na kutala bilanga yina kuna.” Ba vwandaka losa moutarde mpe chlore gazeux, mutindu ba vwandaka sala na bilumbu ya bawu.

¹³⁹ Mpe tubaka, “Mu ke kwenda kuna, Mpangi Branham,” yandi tubaka, “ya vwandaka ve na mpusu na zulu ya yinti, ya vwandaka ve na mwa kitini ya dititi. Ya vwandaka na suka ya Paki.” Yandi tubaka, “Ya vwandaka na mwa bapusu ya ntama ya kubeba kuna, soba zolaka zikisa diambu ya bawu, mpe kumona kana ya vwandaka na kima mosi ba lendaka sala samu na bawu, pene-pene ya Argonne Forest.” Yandi tubaka, “Ntangu mu vwandaka me telama kuna munu mosi,” yandi tubaka, “Mu talaka na zulu, mu tubaka, ‘O Nzambi, yayi kele mutindu yayi nionso ke kwisaka.’” Ya kieleka, yawu nionso ke kwisaka. Ya vwandaka nionso ya kuzika, luzingu vwandaka kisika mosi ve, matiti vwandaka me zika; yinti, na gaz yina, bayinti kufwaka, bima nionso vwandaka ya kufwa, ya kutengama, ya kunamika, kisika ba-balle mpe bima tobolaka yawu.

¹⁴⁰ Kana yina kele ve kifwani ya yinza ya bubu yayi, kisika Satana ke na kumwangisa kukondwa lukwikilu ya yandi, mvukisa ya bankuna ya yandi, science ya yandi, luzabu ya yandi! Tii, yina ya vwandaka na mbandukulu, ntangu Nzambi tulaka Adam mpe Eve na kati ya disamba, paradiso yina ya kitoko kukondwa lufwa, kukondwa kimbevo, kukondwa mawa, mpe bima nionso ya kulunga na ndonga, beno tala yina DDT ya Satana me sala! Yandi kele kawo. Ya kele na kima mosi ve me bikala na kati ya yawu.

¹⁴¹ Yandi tubaka, “Mu bandaka na kuboka. Mu vutukaka na manima, mu bendamaka na ditadi mosi.” Yandi tubaka, “Mu kwendaka kaka kuna mpe talaka ditadi yango, mu pusaka yawu kuna. Kuna na nsi ya ditadi yango vwandaka mwa fololo mosi

ya pembe vwandaka kuyela, kima mosi kaka ya moyo bikalaka, samu ditadi mosi vwandaka keba yawu.”

142 Nzambi, Ditadi ya munu, keba beto bubu yayi, O Nzambi, ntangu bandikila yayi ke pumbuka bisika nionso na nkumbu ya science mpe malongi. Keba beto. Bumba munu tii na kilumbu yina, O Nzambi, ya kele kisambu ya munu. Ntangu yayi mu ke na kivuvu ti beto, beto nionso, kele na nsi ya Ditadi yina, Klisto.

143 Mu vwandaka kaka kulonga kilumbu yina, mingi ya beno kuwaka yawu. Mu vwandaka kuna na kati ya mfinda, na kuzomba, mpe mu bendamaka na kubaluka. Mpe mu talaka, mpe kuna vwandaka carton mosi ya mpamba ya makaya to paké, to yina beno ke bokila yawu. Mpe ya kele kompani, mu ke na nsatu ve ya kubokila bankumbu ya bawu, kasi kompani ya fumu vwandaka. . . ba vwandaka na slogan mosi, “kiyungulu ya muntu yina ke banzaka, ntomo ya muntu yina ke kunwa makaya.”

144 Mu bandaka na kutambula kuna mwa ntama fioti na kati ya mfinda, mpe Kima mosi bendaka munu, “Vutuka na paké yina ya makaya.”

145 Mu banzaka, “Tata ya Mazulu, mu ke kulumuka awa na yinti yina kisika bampandi yina Nge bokilaka na luzingu, na suka mosi. Wapi mutindu Nge ke bokila munu na kuvutuka na manima?”

146 Mpe Kima mosi tubaka, “Nge me kuzwa dilongi mosi samu na Lumingu. Dilongi ya nge me sonama na zulu ya yawu.”

Mu banzaka, “Na zulu ya paké ya makaya?” Mu vutukaka na manima.

147 Mpe mu bandaka na kubanza, “Kiyungulu ya muntu yina ke banzaka,” yinki lukusu ya kele! Kana muntu vwandaka muntu yina ke banzaka, yandi zolaka kunwa makaya ata fioti ve. Kasi, beno me mona, bantu ke mina yawu.

148 Mu ke kwikila ti ya vwandaka bamvula zole me luta, ntangu mu vwandaka na mosi ya balukutakanu ya munu, mu kwendaka kuna na exposition ya yinza ya muvimba ntangu ya vwandaka na Côte Ouest. Mpe ba vwandaka na foto ya Yul Brynner mpe mingi ya bawu kuna. Mpe bantu ya science, mingi ya bawu, vwandaka na couloir mosi samu na kisumbula ya kunwa makaya. Wapi mutindu ba ke bendaka mulinga yina kuna na marbre, mpe ba bakaka mwa Q-tip mpe ba vwandaka katula nicotine kuna mpe vwandaka tula yawu na zulu ya mukongo ya mpuku, mpe ba vwandaka tula yandi na kati ya mwa yinzo mosi, na bilumbu sambwadi ya vwandaka ya kifuluka mingi na cancer ti ya lendaka ve kutambula. Beno me mona? Yandi tubaka. . . Ba vwandaka benda yawu na kati ya masa.

Mu tubaka, “Kiyungulu!”

149 Mu tubaka, “Kiyungulu? Ya kele ve na kima ya mutindu yina.” Mu tubaka, “Nge . . .” Ntangu yayi, yayi kele science yawu mosi. Ba tubaka, “Beno lendaka kuvwanda kaka na mulinga kana beno ke na goudron. Goudron ke salaka mulinga.”

150 Mpe kima mosi kaka ya kele, kele mayele samu na kutekisa makaya mingi, ntangu yina . . . Kana . . . Mu kele ve na kivuvu ti beno ke banza ti mu kele muntu ya luvwezo to fanatiki. Diabulu na kati ya muntu, yina ke sala ti yandi kunwa makaya, samu na kukifwa yandi mosi. Ntangu yandi—yandi ke zola nicotine ya dikaya mosi, yina ke sepelisa nsatu ya yandi, ntangu yayi kompani ke kwisa pene-pene na mayele yayi ya luvunu, mpe ke tuba, “Kiyungulu ya muntu yina ke banzaka.” Yandi ke kunwa makaya yiya to tanu, samu na kukotisa mingi ya goudron na kati ya beno (samu na kusepelisa yandi) mutindu beno salaka na mosi. Ba-Américain ke na kutekisa lufwa na bampangi ya bawu ya babakala mpe bakento! Mu ke bakula yawu ve.

151 Kasi ntete, kuna na kati, mu banzaka, “Ya *kele* na Kiyungulu ya muntu yina ke banzaka ya kele mbote.”

152 Ntangu yayi, kana muntu vwandaka kunwa makaya, beno bambuka moyo, ya ke pesa ntomo ya kunwa makaya. Na yina, kana beno lenda ve kuvwanda na nsa- . . . kifulusa nsatu ya mulinga tii beno ke kuzwa mulinga kuna, beno ke kuzwa . . . fwana kupesa ntomo, na yina, beno ke kunwa makaya yiya, to tanu, mpe beno ke futa mingi samu na yawu kulutila beno zolaka, beno ke kunwa kaka dikaya mosi ntangu nionso. Beno me mona, ya kele mwa mayele, mwa mayele ya kutekila; kuvuna bantu, ba-Américain. Ntangu mu ke banza na Kiwanda ya Forge, George Washington; na zole na zulu ya tatu ya basoda ya yandi, mpe kukondwa basapatu na makulu ya bawu, na kilumbu yina ya madidi, samu na kusadila beto économie yina beto ke na yawu! Na manima ba-Américain ke tekisa Américain, mpangi ya yandi bakala mpe ya kento, lufwa, na mayele ya yimbi, samu na kisalalu ya mvindu, nsimbulu ya bampeve nionso ya yimbi. Mpusa ya mbongo, zola. Nionso me kuma bulawu, na kuzabaka ve ti kima ya muvimba ke kufwa! Kasi kana beno baka ve mulinga, beno lenda ve kuzwa ntomo.

153 Na yina mu banzaka, “Ya kele na Kiyungulu ya muntu yina ke banzaka.” Kiyungulu ya muntu yina ke banzaka! Mpe mu bakaka dilongi ya munu na “Kiyungulu ya muntu yina ke banzaka ke pesa ntomo ya muntu ya santu.”

154 Na yina mu banzaka ti ba-denomination ya beto me sala fioti mutindu yina, ba me kotisa bantu mpe me bokila bawu mosi Baklisto yina kele bumpamba-mpamba. Samu na yinki? Ba ke kotisa mingi na denomination ya bawu to ba-organisation. Beto ke kotisa mingi kuna samu beto ke bika bawu kota na *yayi, yina*, mpe *yankaka*, mpe nionso yina. “Yina ke sala luswaswanu mosi ve, kaka mutindu ba ke tula nkumbu ya bawu na buku mpe

ba ke tuba ti ba kele Baklisto. Yawu yina. Oh, ‘na lukwikilu beno me vuluka.’ Beno fwana kwikila.” Diabulu ke salaka kima mosi. Yinga.

155 Beno fwana butuka mbala zole, mpe yina ke kwisaka na nzila ya Kiyungulu ya Nzambi! Ntangu yayi ya kele na Kiyungulu ya muntu yina ke banzaka. Mu me simba Yawu na diboko ya munu. Mu ke basisa ve ntomo ya denomination, kasi Ya ke sepelisa kieleka ntomo ya muntu ya santu, beno zaba.

156 Wapi mutindu kento yina me zengisa bansuki ke luta na Kiyungulu yayi? Wapi mutindu kento yina me lwata bakupé ke luta na Yawu, to bantu na kukondwa kikesa, ntangu Biblia me tuba, “Ya kele busafu na Nzambi, samu na kento yina ke lwata lele yina kele ya bakala”? Mpe wapi mutindu bakala yina ke banza kima mosi samu na yandi mosi, lendaka basika awa mpe kulwata mutindu bakento, kubika bansuki kuyela mutindu kento, kuna na meso ya yandi, na bansuki ya kuzenga na mbunzu, mpe kubalula mutindu *yina*? Bakala ke lwata basous-vetement ya kento ya yandi. Kento ke lwata bilele ya yandi ya nganda. Kiyungulu ya muntu yina ke banzaka? Muntu yina ke banzaka ke sala yawu ve, to kento yina ke banzaka ke sala yawu ve. Ndinga ya Nzambi ke lutisa yawu ve.

157 Ya kele ve na kima mosi lendaka luta na Ndinga yina. Ya kele Mpeve-Santu, mpe Ya ke kotisa Ndinga na kati ya beno, mpe Ya ke basisa ntomo ya muntu ya santu.

158 Beno tala bubu yayi, ba Ricketta na bala-bala, nzutu ya mbote, ya kitoko Nzambi pesaka yandi, mpe Satana ke sadila yawu. Mpe yandi ke lwata bilele ya nsoni, yandi zaba ve ti na sabala mosi yandi lendaka kupola na ntoni.

159 Mu vwanda kwisa awa na bala-bala ntama mingi ve. Mu vwandaka longi na ba-Assemblée de Dieu kuna na Côte Ouest, na lukutakanu kuna na Lukolo ya Biblia ya Sud. Mama mosi ya fioti vwandaka tambula kuna na bala-bala, mwa . . . me lwata mwa bilele yina, ba-bikini, nionso yina beno ke bokila yawu, mpe mwa nsongi ya lele ya kunamika kuna, na yimpu ya babouvier mpe baboti. Mu vwanda mata kuna na bala-bala. Mu banzaka, “Mputu ya muntu ya fioti, mwa kento mwana ya tata, ba tulaka yandi awa samu na kuvwanda mwana-kento ya Nzambi, mpe ya me kuma mutambu ya mpambu ya diabulu.” Mu banzaka, “Mu ke kwikila ti mu ke baluka kaka mpe mu ke vutuka, mpe mu ke tuba na mwana yina.” Ya monanaka ti ya vwandaka na bamvula pene na Sarah ya munu kuna, bamvula kumi na sambwadi, bamvula kumi na sambanu, to kima mosi. Mu banzaka, “Ve, kulutula mbote ve. Mu ke mata kaka na zulu ya bala-bala mpe mu ke sambila samu na yandi. Kana muntu mosi ke mona munu me telama mpe ke solula na yandi, kulutula mbote kusala yawu ve.”

¹⁶⁰ Ntangu yayi, mpe beno kuwa, bana ya Nzambi, beno me kuma na kisika yina mosi, ba-Jézabel ya kilumbu yayi ke sakana na beno, kasi muntu yina ke banzaka ke banza ntete. Ya lendaka vwanda kitoko mingi, ntangu yankaka ya ke vwanda “Mu lendaka sepela na yandi,” kasi ke lomba nge moyo ya nge, mwana-bakala; bayankaka na kati ya beno bana-bakento, samu na ba-Ricky yina! Kiyungulu ya muntu yina ke banzaka ke basisa ntomo ya muntu ya santu.

¹⁶¹ Beno babakala yina me kwelaka, ntangu beno ke mona bakento yina na bala-bala mutindu yina, beno bana ya Nzambi, beno ke mona ve yina salamaka na mbandukulu ya ntete? Ntangu science kumisaka bakento kitoko mingi na yinza yina ya ntama, ti bana ya Nzambi bakaka bana-bakento ya bantu (bana-bakento ya Nzambi ve), mpe Nzambi me zimbanaka yawu ata fioti ve. Ba bebisaka nionso; science, kitoko mingi. Ya vwandaka vwanda . . . Beno ke mona kitoko ya bakento ke na kumata na bilumbu ya nsuka, ya kele kidimbu ya nsuka; Nzambi me siamisa yawu. Na yina, beno sadila Kiyungulu ya muntu yina ke banzaka, beno ke vwanda na ntomo ya muntu ya santu. Ya ke lomba beno yinzo ya beno. Ya ke lomba beno kisika ya beno. Ya ke lomba beno bima nionso yina beno kele na yawu; na nganda ya yina, moyo ya beno! Ya ke panza dibuta ya beno. Ya lendaka sala ti bakala yankaka kusansa bana ya beno, to kento yankaka kusansa bana ya beno.

¹⁶² Beno baka Kiyungulu ya muntu yina ke banzaka, ya ke basisa ntomo ya muntu ya santu. Ntangu beno ke banda na muzengi bansuki, to kima yankaka, mpe ba ke tuba na beno, “Beno ke vwanda na mpasi na yintu, beno zaba.” Beno baka Kiyungulu ya kento yina ke banzaka, yina Biblia tubilaka, beno me mona, na yina beno kwenda ntama na yawu. Beno me mona? Beno sala yawu ve.

¹⁶³ Mu kele mpangi ya beno ya bakala, mpe mu ke zolaka beno. Mu kele na kima mosi ve ya yimbi samu na beno. Nzambi me zaba. Mpe yawu yina ke sala ti mu tuba mambu mu ke tuba, ya kele samu na—na zola ya Nzambi samu na beno. Kana bakala mosi ke basika kuna mpe ba ke tuba na beno ve, pasteur ya beno ke bika beno vwanda kuna mpe kusala mutindu yina, yandi ke zolaka beno ve. Yandi lenda zola beno ve. Mu ke zola ve zola ya mutindu yina samu na bakento. Mu ke zola vwanda na ntomo ya santu samu na mpangi ya munu ya kento. Mu ke zola yandi vwanda kieleka mpangi ya munu ya kento. Muntu mosi ve lenda tuba, muntu mosi ke tuba na yandi ti yandi kele kitoko mpe wapi mutindu yandi kele, mpe bantinu-kento yina ya sexe, “Yandi ke kwenda na munu . . .” Huh-uh. Ve. Mu ke zola yandi vwanda mama!

¹⁶⁴ O Mfumu, bumba munu na nsi ya Ditadi. Yinga. Na ba-Ephésien 5:26, mutindu mosi kaka beno lenda luta na Ditadi

yina, kele, “Ya kusukwama na bamasa ya kukabwana na nzila ya Ndinga.” Ya kieleka.

¹⁶⁵ Ntangu yayi, beno bika ve diabulu yayi kumwangisila beno malongi ya yandi. Ve, ve. Ya ke kufwa ngolo ya beno. Beno bika ve diabulu kubaka yawu, “Mbote, mu ke vwandaka ya dibuundu yina mama ya munu vwandaka, yina tata ya munu, nkooko ya munu.” Beno bika ve diabulu kumwangisila beno yawu. Biblia me tuba ntete ti, na Bansungi Sambwadi ya Dibundu, mpe nionso kuna, nionso me kwenda na nkuna! Ya kieleka. Nionso me pola. Nionso kele mputa ya kupola. Beno bika ve yandi mwangisila beno, na kutubaka, “Mbote, ya kele malongi ya nene ya bumuntu. Beto me longuka mingi kulutila na bilumbu me luta.” Beno bika ve diabulu kutula yawu na zulu ya beno. Mu me talisa na beno manaka ya yandi nionso ya civilisation, ya malongi mpe science. Ya me kotisa yawu na dibuundu, mpe beno kuwa yawu ve. Beno balula yintu ya beno ntama ya ba-televisions yina ya ntama ya mvindu!

¹⁶⁶ Mpe dilongi ya beto, “Beno fwanana ve, kasi beno vwanda ya kusoba.” Ya kele ve kukota mpe kutuba, “Mu me soba, na Lumingu.” Ve. Beno kota mpe beno soba kaka na ntangu yayi, kusoba na yina beno kele, na yina Nzambi zola beno vwanda.

¹⁶⁷ Ntangu yayi, ya me tala na mutindu ya nkuna yina kele na kati ya beno. kana nkuna ya ya ngangu, ya kulonguka kele na kati ya beno, ya kele kaka na kima mosi ya lenda sala, kutengika beno, yimeni, na mwana ya Nzambi ya bakala to ya kento. Ya kele kima mosi kaka ya lenda sala. Bantu bubu yayi, mutindu mu me tala kuna, ba ke sala mutindu ba ke kwikila ve ti Nzambi kele.

¹⁶⁸ Pardo samu na nzonzolo yayi. Kana mu me lwadisa bansatu ya muntu mosi na nzila ya yawu, mu zolaka tuba yawu ve. Balumingu zole to tatu me luta ba bokilaka munu, na mwana ya munu ya kento, na kukwisa na téléviseur mosi mpe samu na kutala musambidi vwandaka yimba. Ya vwandaka na Lumingu na suka. Mu zolaka kuwa Oral Robert samu na manaka ya yandi, mu tubaka na bawu na kuzabisa munu. Yandi tubaka, “Kwisa kuwa yayi, yayi kele mukunga ya nene.” Mwana ya munu ya bakala yina me telama kuna, tubaka na munu samu na yawu, diaka. Mpe mu balulaka téléviseur yina . . .

¹⁶⁹ Beto vwandaka futila na yinzo ya kento mosi vwandaka na television na yinzo ya yandi. Mu kele na dibanza ata fioti ve ya kuvwanda na mosi na kati ya yinzo ya munu. Ve, tata. Mu ke zola kima yina ve na yinzo ya munu. Mu ke pumbusa yawu na munduki ya munu. Mu ke na kima ve ya kusala na kima yina ya diabulu. Ve, tata! Kasi mu bakaka . . .

¹⁷⁰ Bika mu tuba na beno bantu ya Arizona awa. Beno me mona dibanza kilumbu yina, ya balukolo, beno monaka yawu ve? Makumi nana na zulu ya nkama mosi ya bana na balukolo ya Arizona kele na kimbevo ya yintu, makumi sambanu na zulu ya

nkama mosi na kati ya bawu vwandaka tala télévison. Yinki ya kutuba samu na yawu?

¹⁷¹ Beno ke sala mbote na kusadila munduki ya beno! Beno me mona? Ntangu yayi, beno bika ve diabulu kumwangisila beno yawu. Ve, tata. Ntangu yayi bantu, mutindu mu tubaka, bantu ke sala mutindu ba ke kwisa ve na Lusambusu.

¹⁷² Bana-babakala yayi mpe bana-bakento yayi, ba vwandaka na mwa dibuta ya ba-Indien, mpe mwa bima nionso yina. Mu banza mpangi mosi na nkumbu ya Tata Pool kele mfumu ya yawu. Mpe kana mu me monaka ntete ve nkunga ya baseki ya bilumbu yayi, ya vwandaka mutindu ba vwandaka twadisa yawu; nkonga ya ba-Ricky ya kutelama kuna, na kuningisaka maboko ya bawu na zulu mpe na ntoto.

¹⁷³ Ya kieleka mu me sepela na bakala yina ya ntwenia awa na suka yayi, yina yimbaka, ya vwandaka na luzitu, mutindu bakala ya kieleka. Mu—mu zola yawu. Ntangu beno—beno bantu ya mumbongo na ntangu mosi awa beno bakaka nkonga ya ba-Ricky yayi me telama awa, mpe kuboka mpe makelele, mpe kuboka ya ngolo, mpe kukanga pema ti ba ke kuma bleu na kizizi; mpe yina kele kuyimba ve, ya kele kaka kutula makelele mingi ya bantu ya science. *Kuyimba* kele “mélodie ke katuka na ntima.”

¹⁷⁴ Mpe mu banzaka, “Mawa mingi! Ya kele nsoni! Na yina wapi mutindu na nkumbu ya nsambulu, ba ke sala mutindu Nzambi kele ve!” Muntu mosi tubaka, kilumbu yina, na mwana-bakala yina ke tambula na mwana ya munu ya kento. Mwana-bakala ya Muklisto tubaka, ya pesaka yandi dilongi mosi ya mayele samu na Adam na Eve, ya tubaka, “Eve vwandaka tambula na kati ya disamba. Ya tubaka, ‘Bana, beno ke mona yinti yina?’ Ya tubaka, ‘Ya kele kisika yina mama ya nge ke kudiaka beto na nganda ya yinzo mpe na yinzo.’” Beno lendaka banza, ya lendaka vwanda Muklisto ya kwikama, yina ke baka nsilulu mosi mpe Ndinga ya Nzambi mpe kulosa yawu na yinzo ya bangulu! Ba ke sala mutindu ba ke kwisa ve na Lusambusu. Kasi Nzambi ke nata binsweki nionso na Lusambusu. Ba ke sala mutindu Nzambi kele ve.

¹⁷⁵ Mu ke zola ve kubokila bawu zoba, samu Biblia me tuba zoba . . . kele mbote ve. Yesu tubaka ya kele ve. “Beno bokila muntu mosi ve zoba.” Kasi na Psaume 14:1, “Zoba tubaka na kati ya ntima ya yandi, ‘Nzambi kele ve.’” Beno me mona? Ba—ba kele ve . . . Mu ke zola ve kubokila bawu bazoba, kasi ba ke sala mutindu ba kele. Ba ke sala yawu.

¹⁷⁶ Na yina, beno me mona kisika beto kele bubu yayi, mutindu, “Nzambi kele ve.” “Mu kele na dibuundu mosi!” Mpe bawu nionso, nionso, Biblia, kele nsaka ya nene. “Dibuundu ya beto zaba kisika ba ke kwenda!” Yinga . . . [Kisika ya mpamba na bande—Mu.] . . . mbala mosi na difelo, ya kieleka. Kaka na nzila

ya bawu, kaka na nzila ya science mpe malongi, baseminere ya théologie mpe nionso yina, ke kulumusa bawu kaka na nzila. Mpeve-Santu kele ve na siansi ya kupesa luzayikisu na kima mosi ve; seminere me zenga yawu.

177 Mpeve-Santu fwana twadisa beto; seminere ve, ba-évêque na ba-surveillant général ve, mpe nionso yina. Mpeve-Santu kele Ntwadisi ya beto.

178 Caïn vwandaka muntu ya mutindu yina. Yandi vwandaka musambidi ya kieleka. Ntangu yayi, kana nsambulu kele nionso yina beno fwana vwanda na yawu, na yina Nzambi vwandaka ya kieleka ve samu na kufundisa Caïn. Samu, yandi vwandaka musambidi, yandi vwandaka musambidi ya kieleka mpe ya kuvedila mutindu Abel vwandaka. Ntangu yayi beno bambuka moyo, yandi banzaka na Nzambi, yandi sambilaka Nzambi, yandi vwandaka na dibuundu, yandi tungaka autel, yandi salaka munkayulu, yandi sambilaka, yandi kembilaka, kasi ba losaka yandi. Ata ti wapi mutindu... Esau vwandaka, mpe. Beno me mona?

179 Nsambulu, beno me mona, ya kele kisalu ya Satana; ya kele ve kufwa nionso, kasi kaka kutula yawu mvindu. Yimeni. Yandi ke kufwa nionso ve. Oh, ba-communiste ve; ve, ve, mbeni ya Klisto kele ve communisme. Biblia me tuba, “Ya ke vuna Musolami kana ya lendaka salama.” Beno tala ve rideau ya kisengo, kasi yina ya mbwaki. Uh-huh.

180 Kasi, beno tala, Caïn kwisaka samu na kukembila, kasi yandi vwandaka na nkuna ya yimbi na kati ya yandi, nkuna ya nioka. Mwita ya nioka bulaka na zulu ya yandi, samu yandi vwandaka nkuna ya kento. Yandi zabaka luzolo ya kulunga ya Nzambi, kasi yandi mangaka na kusala yawu. Beno me zaba yawu ve? Satana me zaba luzolo ya Nzambi, kasi yandi ke manga kaka na kusala yawu.

181 Beno tala, yandi monaka Nzambi kusiamisa nsangu ya Abel. Ntangu yayi mu ke zola ti beno banza, beno sadila ntangu yayi Kiyungulu ya beno ya muntu yina ke banzaka na mwa ntangu fioti. Nsangu ya mbote ya Abel, yina Nzambi siamisaka ti ya kele Kieleka! Beno me bakula ntangu yayi? Uh-huh. Nsangu ya Abel vwandaka me ndimama, mpe Caïn monaka yawu mpe zabaka ti Nzambi me siamisaka nsangu yina ya kieleka. Kasi yandi lendaka kaka kusala yawu ve. Lulendo ya yandi pekisaka yandi na kusala yawu. Ya kieleka, lulendo ya yandi pekisaka yandi na kusala yawu. Yandi monaka Nzambi kusiamisa nsangu.

182 Na yina ya ke monana mutindu ya kele na ntangu yayi, mpasi mingi samu na bantu na kukikulumusaka bawu mosi na Ndinga ya Nzambi. Bawu—bawu—bawu zola ve kusala yawu. Ba ke kukikulumusaka bawu mosi na credo ya dibuundu, ya kieleka, kasi na Ndinga ya Nzambi ve.

¹⁸³ Kana beno zola kumona yawu, beno kwenda na . . . Mu kele na Masonuku awa, yawu yina mu ke tala awa. Genèse 4:6 mpe 7, Nzambi tubaka na Caïn, tubaka, “Samu na yinki kizizi ya nge me kuma na nganzi? Samu na yinki beno me fuluka na nganzi, nge ke tambula sika na sika? Nge me kuwa kaka nsangu yina me niongisa nge.” Yandi tubaka, “Mbote, samu na yinki nge ke sala mutindu yina? Samu na yinki beno kuma na nganzi, samu mu me kwisa ve na yinzo-Nzambi ya beno? Na yina samu na yinki beno me sala mutindu yina?”

Beno ke sadila Kiyungulu ya muntu yina ke banzaka? Beno me mona?

¹⁸⁴ To, “Samu na yinki . . . Samu na nge ke monana mutindu yina?” Yandi tubaka, “Kana nge zola sala mbote, kwenda sala mutindu mpangi ya nge me sala kuna, mu ke ndima nge mpe ke sakumuna nge. Mu ke sadila nge kima mosi.” Kasi yandi lendaka kaka kusala yawu ve. Yandi tubaka, “Ntangu yayi, kana nge sala yawu ve, disumu ya kukondwa lukwikilu kele na kielo.”

¹⁸⁵ Ntangu yayi ntangu ba ke tuba na beto, “Bilumbu ya bimangu me luta,” ba ke mona yawu ya me siamisama mpe me talisama na mutindu ya kulunga, beno me mona, bima yayi nionso Nzambi silaka Yandi ke sala na bilumbu ya nsuka, na Apocalypse 10 mpe Malachie 4, bima yayi nionso me siamisama na mutindu ya kulunga, wapi diambu, bampangi? Yinki ke tambula mbote ve, beno me mona?

¹⁸⁶ Kana ba ke sala yawu ve; kukondwa lukwikilu, yina kele disumu. Ya kele kaka na disumu mosi, ya kele, kukondwa lukwikilu. Ya kieleka. Ba me fundisa beno ve samu beno ke kunwa malafu, beno ke kunwa makaya, beno ke benda fumu, beno ke lwata bakupé, beno ke sala nionso yina beno ke sala. Ve, yina ke fundisa beno ve. Ya kele samu beno ke kwikilaka ve. Kana beno me kwikila, beno ke sala yawu ve. Beno me mona? Mukwikidi ke sala yawu ve. Yandi ke baka Kiyungulu ya bakala yina ke banzaka, beno me mona, beno me mona, to Kiyungulu ya kento yina ke banzaka, to mosi. Mbote mingi. Kasi, beno me mona, disumu me vwanda na kielo.

¹⁸⁷ Ntangu yayi beno tala yina yawu salaka na Caïn, mpe ya ke vwanda mutindu mosi bubu yayi. Ya salaka ti Caïn kukwenda ntama, nsumuki ya luzolo. Yandi tumamaka ve na luzolo. Bantu nionso ke vwanda mutindu yina. Yandi tumamaka ve na manima yandi me mona nsangu ya Abel me siamisama pwelele na Nzambi, ti ya vwandaka kieleka, mpe yandi mangaka na kusala yawu. Ya salaka mutindu mosi na ntangu yina. Na manima yandi zabukaka ndilulu.

¹⁸⁸ Ya kele na ndilulu beno lenda zabuka. Beno zaba yawu, mutindu yina ve? Ntangu yayi, balongi, awa mpe kuna na yinsi ya allo-allo kisika émission yayi ke kwenda na yinsi, beno ke bakula yawu? Ntangu beno ke mona ti ya kele Masonuku, mpe beno

ke zola ve kusala yawu, Nzambi ke zola ve ntangu nionso. . . Yandi ke . . . Oh, beno ke landila, beno sakumuka. Mutindu yina Israel nionso vwandaka, ba zingaka kaka na ntoto ya kuyuma, mpe ba sansaka bana, bimenina, mpe ba sukumukaka, mpe bima nionso, kasi “mosi na mosi ya bawu kabwanaka Kukonda nsuka na Nzambi.” Yesu tubaka mutindu yina. Oh, yinga, Nzambi ke sakumuna beno kaka, kasi beno me kwenda. Ya kieleka. Yawu yina Biblia me tuba ntangu yayi, yawu yina Yandi tubaka. Beno tala, beno lenda zabuka ndilulu yina. Beno ke kwikila yawu? Caïn salaka yawu.

¹⁸⁹ Beto—beto baka kaka awa na mwa ntangu fioti, mu ke baka ba-Hebreux 10:26. Beto tala kana mu lenda mona yawu kaka nswalu. Buku ya ba-Hebreux, kapu 10 mpe. . . Mu ke kwikila, nzila ya 26. Mu sonikaka yawu awa. Beno vingila fioti, kana beno ke kanga ntima na munu, mpe beto tanga Yawu kaka na mwa ntangu fioti. Mbote mingi, beto me kuma kisika yango.

Ya kieleka kana na manima beto . . . me zaba kieleka, beto tatamana na kusala masumu na luzolo ya beto, ya ke diaka ve na munkayulu yankaka yina lenda kukatula disumu,

Kasi ya me bikana kaka ti kuvingila na boma nionso, lufundusu yina Nzambi ke sala mpe tiya ya ngolo yina ke yoka mbeni ya yandi.

¹⁹⁰ Ya kele MUTINDU ME TUBA NDINGA YA SANTU YA NZAMBI. Kana beto kukwikila ve na luzolo ya beto na manima beto me mona Yawu mpe me kuwa Yawu, na yina beto me zabuka ndilulu. Ya ke vwanda ata fioti ve na lemvo samu na yawu, beno me zabuka ndilulu.

“Oh,” beno ke tuba, “Nzambi ke sakumuna munu kaka.” Oh, yinga.

¹⁹¹ Beno bambuka moyo na Israel, *na bandilulu*, ntangu Nzambi pesaka bawu nsilulu mosi, kuna na Yinsi ya Santu, . . . na kati ya yinsi, ya vwandaka mbote, ya miliki mpe mafuta ya niosi, mpe ntangu Moise fidisaka Caleb na Josué kuna, mpe balangididi, kwendaka kuna, samu na kulangidila yinsi, mpe ba vutukaka na nzikisa yina me siamisama, kumi na kati ya bawu tubaka, “Beto lenda sala yawu ve, beto lenda ve, beno tala mpasi yina kele kuna, beto ke vwanda bafanatiki, beto kele na bima yayi ya fioti samu na kunwana na yawu, beno tala yina ba kele na yawu, beto—beto lenda sala yawu ve, beto kele ve na lenda ya kusala yawu.”

¹⁹² Josué na Caleb tubaka, “Beto kele na kiyeka kulutila mingi samu na kusala yawu, Nzambi salaka nsilulu.”

¹⁹³ Mpe, beno bambuka moyo, ba vutukaka. Yina vwandaka na Kadès-barnéa. mpe ba vutukaka mpe kumaka kuyenga-yenga na kati ya ntoto ya kuyuma. Mpe bantu nionso kufwaka, mpe ba me zimbana Kukonda nsuka. Yesu tubaka mutindu yina.

194 Beno zabuka ve ndilulu yina, beno me mona. “Ntangu beno zaba kusala mbote, mpe beno ke sala yawu ve, samu na beno ya kele disumu.”

195 Israel salaka mutindu mosi. Na manima ba monaka Moise me siamisama, na manima ba bikaka Balaam kumwangisila bawu, Nkuna ya kitoko yina me siamisama. Pasteur, beno tuba ve (ata fioti ve) kima mosi ya yimbi samu na Ndinga. Beno tala Balaam, yandi vwandaka profete, mpe yandi monaka Nkuna ya Nzambi me siamisama. Kasi na denomination ya yandi ya nene yina ya vwandaka zinga, Moab monaka nkonga ya bantu yina vwandaka yenga-yenga na kati ya yinsi, yandi mwangisaka yawu, mpe yandi tubaka, “Mbote, beno vingila fioti. Beto nionso kele Baklisto. Beto nionso kele bakwikidi. Na yina, batata ya beto mpe batata ya beno kele mutindu mosi. Beno kele bana ya Lot ve? Lot vwandaka mwana-mpangi ya Abraham ve? Beto kele mutindu mosi? Beto kwelana mosi na yankaka.”

196 Mpe Israel, mutindu Eve na disamba ya Eden, bikaka Satana kumwangisila yandi, yandi mwangisilaka diaka Israel na nzila ya profete ya luvunu. Kasi, profete ya kieleka vwandaka na bawu, na Ndinga yina me siamisama. Kasi na nzila ya luzabu ya dibanza ya ngangu, yandi mwangisilaka bawu. Beno banza yawu. Ntangu yayi, ba lemvokilaka yawu ata fioti, ba lemvokila disumu ata fioti ve.

197 Bankuna kupolaka kaka na nzila ya kisalu, na nzila ya yinsi ya nsilulu. Bawu nionso fwaka mpe polaka, mbala mosi na dibuundu, na ndilulu ya kisalu, na kulandaka Nzambi. Mpe ba bikaka Satana kumwangisa masa yina ya ngangu na zulu ya bawu, malongi, dibanza ya ngangu, na kutubaka, “Na yina, beto nionso kele mutindu mosi, beto nionso kele bana ya Nzambi.” Beno kele ve! Kasi yandi bikaka mulongi yina ya luvunu kuna kumwangisila bawu dibanza yina ya ngangu yina ya vwandaka na yawu samu na Yawu.

198 Mpe kaka mutindu Conseil Oeucuménique ke na kusala kaka na ntangu yayi, beno me mona, kima mosi, “Na yina, beto nionso ke vukana kintwadi na kati ya organisation mosi ya nene.” Systeme ya beno nionso ya organisation kele ya diabulu. Ya kele kidimbu ya niama, na kati ya Biblia. Mu ke sala buku na zulu ya yawu, ntama mingi ve, kana Mfumu kuzola.

199 Beno tala, na ntangu ya Noé, na kumona Ndinga ke tungama, samu na kuluta na zulu ya masa. Ntangu beno bika mu pesa mwa dibanza mosi ya fioti awa, Ndinga ke vukana kintwadi samu na kusoba ntoto na mazulu. Kumona nsalulu ya kima yango; kasi na mabanza ya bawu ya ngangu, ba vwandaka seka na kizizi ya profete, Noé, ntangu yandi vwandaka pesa profesi samu na ntangu ya nsuka. Kasi yinki ba salaka . . . Kima yango salamaka na Ndinga ya Nzambi, yina dindaka na kati mpe na nganda, na kisambu mpe lukwikilu. Ntangu bamvula kwisaka, mabanza

nionso ya ngangu ya bansambulu kufwaka mpe polaka kaka na . . . kaka na mabuundu ya bawu, kaka na zulu ya ntoto. Mpe nzaza lutaka na zulu ya yawu nionso. Nkuna yina bantu ya bantu science polaka kuna na lusambusu.

²⁰⁰ Yinki beto ke meka na kusala, na mutindu nionso, beto ke meka na kutula dibuundu ya beto to beto ke meka na kutula Ndinga ya Nzambi? Yinki beto ke meka na kusala? Yinki beto ke na kusala? Beto ke meka na kukotisa bantu na Yayi? Yinki Eve yayi ya nene ke meka na kusala awa na bilumbu yayi ya nsuka, dibuundu yayi ya Eve?

²⁰¹ Mu ke fwana sukisa ntangu yayi, samu ntangu—ntangu me luta mingi. Beno pesa munu kaka mwa minuti kumi na tanu diaka, mpe mu ke sukisa na Masonuku ya munu—ya munu awa. [Mpangi-bakala mosi me tuba, “Ya kieleka, kwenda na ntwala.”—Mu.] Yinga. Mbote mingi. Mu zaba. Mbote, bantu kieleka ke zola kukota awa mpe kusukula yayi. Kasi mu ke monana kaka ya kele mpasi samu na munu na kusukisa. Mu ke sala nswalu. Mbote mingi.

²⁰² Beno tala, mvukisa ya nene ya science, ya malongi, ya Eve bubu yayi, ba me bokila dibuundu, yinki yandi ke meka na kusala? Yandi ke na kuzangula Ndinga ya Nzambi, mpe ke bika bantu kusala mutindu ba ke na kusala? Ba ke na kusadila ve Kiyungulu ya muntu yina ke banzaka, to, Kiyungulu ya Nzambi. Beno tala yina ba ke na kubasisa. Ba ke na kukizangula bawu mosi. Dibundu kele, na kati ya nkuna ya yandi ya kutengama ya manaka ya luzabu, me nata dikanda ya muvimba na kuvwanda landila science yina me zaba ve Ndinga ya Nzambi. Ntangu yayi mu ke simba mabanza yina, mu ke tubila yawu ntangu ya yinda mingi ve, samu na kumanisa. Landila science ya ke zaba diambu ve! Ntangu Nzambi, awa na zulu ya ntoto, ke sala bima yina Yandi ke na kusala, na nzila ya Ndinga ya Yandi ya nsilulu, mpe ba ke zaba Yawu ve mpe ke kwenda ntama samu ba me zaba kima ve landila science. Ba me zaba kima ve landila science!

²⁰³ Mu vwandaka seka kuna samu na Mpangi Williams awa, yina sonikaka awa na zulu ya kitini ya mukanda, “Nge lenda bikana na yawu manima ya midi nionso,” kima mosi. Kasi, mu ke sepela na yawu, ya kele kieleka mbote. Beno me mona?

²⁰⁴ Kasi bantu ke—ke sumuka na luzolo. Ya me kotisa systeme nionso ya dibuundu ya yinza bubu yayi na kusumuka na luzolo na Nzambi. Na yina, bumuntu ya bantu nionso ke siamisa beno ti Ya kele kieleka. Mbote mingi. Vwale ya mpusa ya nzutu me kufwa meso ya bawu, na Ndinga ya Nzambi, mpe ya me monana yandi mosi kinkonga diaka. Beno zaba, Nzambi, na Apocalypse 3, tubaka, “Kwisa, sumba nkisi ya meso na Munu, ti meso ya nge ke zibuka.” Beno me mona, Nkisi ya meso kele Ndinga ya Nzambi.

205 Beno zaba, ba ke tuba, “Mbote, bakala yayi me longukaka bamvula makumi yiya, samu na kuzwa ba-diplome ya yandi. Yandi kele Docteur na Lettre, Docteur na Théologie, mpe nionso yayi.”

206 Beno zaba yina Yesu tubaka samu na yawu? Yandi tubaka, “Bika ti muntu kukimanga yandi mosi.” Paul salaka yawu.

Beno ke tuba, “Ya zola kutuba yina ve.”

207 Mbote, samu na yinki Paul landaka yawu kuna, na ntangu yina? Yandi tubaka, “Mu me kwisa na beno ata fioti ve na bandinga ya kingolo-ngolo ya ndwenga ya muntu, samu beno ke tuba kivuvu ya beno na zulu ya yawu. Kasi mu me kwisa na beno na ngolo mpe bakumonisama ya Mpeve-Santu, ti ndinga ya beno ke vwanda. . . lukwikilu ya beno ke tungama na zulu ya Ndinga ya Nzambi, na zulu ya bakumonisama ya ndwenga ve.”

208 Ya ke monana ti bantu me zimbisa bumuntu ya bawu ya kimvuka mpe luzitu. Ba kele ve mutindu ba vwandaka. Ya vwandaka, ntangu profete me tuba, “MUTINDU ME TUBA MFUMU,” bantu vwandaka tekita. Yinga, ya kieleka ba salaka yawu. Bantu vwandaka kwenda, samu ba vwandaka na boma. Kasi ntangu yayi ba me zimbisa boma ya bawu nionso samu na Yawu. Ba kele na boma ya Nzambi ve.

209 Salomon tubaka, “Boma ya Nzambi kele mbandukulu ya mayele,” kaka na mbandukulu ya yawu.

210 Kasi profete lenda tuba MUTINDU ME TUBA MFUMU; bantu ke tuba “buzoba!” Beno me mona, ya kele ve na kivuvu samu na bawu. Ya kele, ba ke tuba, “Na yina, beto kele bantu ya mayele. Beto kele bantu ya ngangu, beto fwana baka bima ya mutindu yina ve! Beto zaba yina beto ke tubila!”

211 Ya kele diaka kingana ya ntama, ti, “Bilawu ke tambula na basapatu ya bawu ya kilo ya bansoso, kisika Bawanzio kele na boma ya kutambula.” Ya kieleka.

212 Ntangu yayi, yinki kele kusoba? (Na nswalu nionso.) Wapi mutindu beno ke bakula yawu? Yinki ke salaka kusoba? Nzambi ke salaka yawu na nzila ya Mpeve ya Ndinga ya Yandi. Yandi ke sobaka. Yandi ke kunaka Nkuna ya Yandi, ke losa Mpeve ya Yandi na zulu ya Yawu, mpe Yawu ke basika mbuma. Mpeve-Santu ya Yandi ke sobaka Nkuna ya Nzambi na kati samu na kuvwanda ya kusiamisama na mutindu ya Yawu.

213 Wapi mutindu ya nkuna beno kele, ya ke talisa kaka yina kele na kati ya beno. Beno lenda bumba yawu ve. Nionso yina beno kele na kati, ya ke monana na nganda. Beno lenda kaka kubumba yawu ve. Beno lenda ve kusala yinti yina kima yankaka kasi yina ya kele. Beno me mona, ya ke—ya ke vwanda mutindu yina. Mpeve-Santu ke sobaka bankuna yina kele na kati ya yawu. Ya vwanda mutindu ya nkuna ya kele, Ya ke soba yawu. Kana ya kele mpeve ya yimbi, ya ke basisa mpeve ya yimbi. Kana ya kele

muntu ya luvunu, ya ke basisa muntu ya luvunu. Kana ya kele Ndinga ya Nzambi ya kieleka, Ya ke basisa mwana-bakala to mwana-kento ya kieleka ya Nzambi, na nzila ya Kiyungulu ya muntu yina ke banzaka. Ntangu Nkuna ke kwisa, Ya ke kwisa na nzila ya Yawu, Ya ke basisa mwana-bakala mpe mwana-kento ya Nzambi.

²¹⁴ Kilumbu mosi ntangu yinza vwandaka na kati ya mudidi ya kawo, Nzambi. . . Ntangu yayi beno kuwa na bukebi, samu beto ke tubila ve. . . kaka mwa fioti diaka. Beno tala. Kilumbu mosi ntangu yinza vwandaka diaka na kati ya bansambulu ya mutindu na mutindu, kusukula maboko, banzungu, na kulwata ba-robe mpe bayimpu, mpe nionso yina, ya vwandaka na kati ya kawo ya muvimba. Israel ya kieleka ya Nzambi vwandaka me beba mingi na misiku mpe bandiatulu ya Nzambi, Yesu tubaka, “Beni, na binkulu ya beni, ke sala Ndinga ya Nzambi kukondwa ngolo na bantu, na nzila ya binkulu ya beni.” Mpe beni tala banganga-Nzambi ya bawu ya basantu, ba ke bokila bawu; mpe Yesu tubaka, “Beni kele ya tata ya beni, diabulu, mpe beni ke sala bisalu ya yandi.” Beni me mona, yawu yina kieleka Yandi tubaka.

²¹⁵ Ntangu yayi ntangu yinza vwandaka me telama mutindu yina, Mpeve ya Nzambi vwandaka tambula diaka na zulu ya Nkuna yina ba zabaka na ntwala. Yandi bangulaka mpe sobaka Esaie 9:6 ya nsilulu ya Yawu; Yandi, Nzambi, vwandaka na kati ya nzutu ya muntu, samu na kuvulusa ntangu yina ya kawo. Ntangu muntu vwandaka me salama na kifwani ya Nzambi, Nzambi kwisaka, na nzila ya profete yina monaka yawu na ntwala. . . Ntangu yayi beni bambuka moyo na Ndinga, profete monaka yawu, kaka profete mosi yina monaka Satana na bilumbu yayi ya nsuka, beni me mona, na manaka ya malongi mpe bima yandi ke na yawu, manaka ya nsambulu. Profete mosi, Esaie 9:6, me tuba, “Samu na beto Mwana me butuka, samu na beto Mwana me pesama; mpe Nkumbu ya Yandi ke vwanda ‘Konseye, Ntinu ya Ngemba, Nzambi ya Ngolo, Tata ya Kukonda nsuka.’ Mpe kimfumu ya Yandi ke vwanda na nsuka ve.” Mpe Ndinga yina kele Ndinga ya Nzambi. Mpe Mpeve vwandaka tambula na zulu ya Ndinga yina, mpe Ya salamaka na kati ya kivumu ya mwense mosi. Amen. “Mwana mosi me butuka,” ba me vanga ve, “me butuka.”

²¹⁶ Satana mekaka mpe mekaka diaka, samu na kumwangisa Yawu. Yandi nataka Yandi na zulu mpe tubaka, “Kana Nge kele yina Nge ke tuba ti Nge kele, na yina sala kitini ya luniakusu awa samu na munu. Talisa munu wapi mutindu Nge lenda sala yawu. Kitula, dimpa yayi, mpe matadi yayi na mampa. Bika Nge lemuka, samu Masonuku me tuba Nge ke sala yawu.”

²¹⁷ Beni me mona bampeve ya yimbi yina ya basambidi bubu yayi ke na kutuka kima ya mutindu mosi? “Kana ya kele na kima

ya mutindu yina mutindu kubeluka ya Kinzambi; awa me lala Mpangi-bakala *Kingandi*, beto zola mona nge kubelusa yandi.”

218 Diabulu yina mosi telamaka na kulunsi ya Yesu, na tubaka, “Kana Nge kele Mwana ya Nzambi, kulumuka na kulunsi.”

219 Ndinga me tuba Yandi vwandaka Mwana ya Nzambi. Mpeve siamisaka ti Yandi vwandaka Mwana ya Nzambi. Esaie 9:6 me salama. Mpe na nkokila yina, mingi na kati ya beno na radio kuwaka wapi mutindu ti beto pesaka mwa Masonuku makumi sambanu ya ngitukulu, kieleka, mu ke kwikila, samu na kusiamisa ti Masonuku me tuba ti Yina vwandaka Yandi.

220 Oh, Satana mekaka mpe mekaka diaka, na kusala nionso. Na nkokila mosi, ya kulala na manima ya masuwa, yandi monaka Yandi me lala. Mpe yandi tubaka, “Mu ke bebisa Yandi ntangu yayi.” Kasi yandi lendaka ve.

221 Yandi mekaka na kumeka Yandi na kusalaka kima ya yimbi, kasi yandi lendaka sala yawu ve. Samu na yinki? Yandi vwandaka me mwangisa na kumanga ya predestination. Ba lenda ve kuvunama. Ve, ve. Ndinga me tuba Yandi ke vwanda awa. Amen. Ya kele ve na mpeve ya yimbi ke niongisa Yandi, mpe ata mwana yankaka ya Nzambi ve, ba zabaka yandi na ntuala samu na kubaka kisika ya Yandi. Yandi me mwangisa yawu na kumanga. Ndikila ya Satana, ba-docteur ya ba-denomination lenda simba Yandi ata fioti ve. Yandi ke kwenda na ntuala, kima mosi ve ke niongisa Yandi, beno me mona. Ya ke sala kima mosi ve na zulu ya Yandi.

222 “Mbote, mu ke sala Nge évêque ya ntoto ya muvimba. Mu ke yala na zulu ya yawu. Kana kaka Nge ke sambila munu, kwisa kota na kimvuka ya munu, mu ke—mu ke sala Nge mfumu. Mu ke kulumuka, mu ke matisa Nge.”

223 Yandi tubaka, “Kwenda ntama ya Munu, Satana. Ya me sonama, ‘Nge ke sambila Nzambi, Ndinga, mpe Yandi kaka nge ke sadila.’” Na yina kilumbu mosi . . .

Samu na Muntu yayi ya nene, mu ke zola bikala kuna mwa ntangu fioti.

224 Kasi kilumbu mosi, Mpeve vwandaka diaka na zulu ya Yandi; samu ya vwandaka na Ndinga yina ba sonikaka samu na Yandi, yina katukaka na Nzambi, na nzila ya profete, “Mpe ba vwandaka twadisa Yandi na abattoire, mutindu mwana-dimeme.” Mpe Mpeve vwandaka tambula na zulu ya Yandi, mpe twadisaka Yandi, mpe fidisaka Yandi na kulunsi ya Calvaire. Kuna Yandi kufwaka. Mpe bima nionso yina ba tubaka samu na Yandi na lufwa ya Yandi, salamaka, samu na kunata Nsemo mpe Luzingu na Nkuna ya Nzambi nionso yina me solamaka yina vwandaka na zulu ya ntoto. Yandi nataka mutindu ya kusala yawu. *Awa* kele Nkuna, Mpeve ke nataka Luzingu; samu na kusoba bana-babakala mpe bana-bakento ya Nzambi, na yinza

na kati ya kawo yayi ya mudidi, samu na kuvwanda bana-babakala mpe bana-bakento ya Nzambi.

²²⁵ Beno bula disakuba ve samu na mpova yina “prédestination.” Mu zaba ti beno ke sala yawu. Kasi, beno kuwa, Ya kele mpova ya munu ve. Ya kele mosi ya Bampova ya Nzambi. Beno zola kutanga yawu, beno tanga ba-Ephésien 1:5, na yina, “Yandi zabaka beto na ntwala samu na balukumu ya bana na nzila ya Yesu Klisto.” Beno me mona?

²²⁶ Beno bika kaka mu buka yawu kaka na mwa ntangu fioti, na mwa ntangu fioti kaka, samu na kubasisa yayi na mabanza ya beno. Beno tala. Kaka mutindu beno vwandaka na kati ya tata ya beno, na mbandukulu, nkuna ya germe. Beno me zaba yawu, mosi na mosi ya beno? Beno vwandaka na kati ya nkooko-nkooko-nkooko ya nkooko ya beno, diaka, beno me zaba yawu?

²²⁷ Beno tanga Buku ya ba-Hebreux, kisika yina beto ke mona ti Levi futaka mosi ya kumi ntangu yandi vwandaka na kati ya ba-rein ya Abraham, bansungi yiya na manima ya yandi. Ntangu Abraham futaka mosi ya kumi na Melchisédek, ba tangaka yawu na mutekolo-mutekolo-mutekolo kuna na nsi ya yandi, mpe yandi vwandaka kuna na kati ya ba-rein ya Abraham. Yawu yina. Beno me mona?

²²⁸ Beno vwandaka na kati ya ba-rein ya tata ya beno, kasi tata ya beno lendaka ve kuvwanda na ngwisani mosi na beno tii kuna beno sobaka na nzutu ya nsuni.

²²⁹ Mwana ya munu ya bakala vwandaka na kati ya munu. Mu—mu—mu zolaka mwana ya bakala, kasi yandi vwandaka na kati ya munu kuna. Beno me mona? Yandi vwandaka na kati ya munu kuna. Kasi na kati ya kimvuka ya makwela, yandi sobaka na muntu mutindu munu, na manima yandi me kuma mutindu munu.

²³⁰ Mpe beno me kuma mutindu bibuti ya beno, beno me mona, samu ya vwandaka na kati ya beno, samu na kubanda. Ntangu yayi kana beto kele bana ya Nzambi, binama ya Yandi. . . Na yina, beno kele kinama ya tata ya beno, ya mama ya beno ve; ya tata ya beno. Germe ke vwandaka na kati ya tata. Beno me mona? Mpe ntangu yayi mama ya beno vwandaka munati yina vwandaka nata beno, kunata nkuna ya tata ya beno. Beno me mona?

²³¹ Mpe ntoto, na kati ya nsuni, kele diaka munati yina ke nata nkuna ya Nzambi. Beno me mona, ya kieleka kaka. Ya kele yinza ve, wapi mutindu yinza kele nene; ya kele nene mutindu Nzambi yina salaka yawu. Beno me mona? Beno me mona?

²³² Ntangu yayi kana beno kele mwana-bakala mpe mwana-kento ya Nzambi, na yina beno vwandaka na kati ya Nzambi na mbandukulu. Beno kele kinama ya Yandi. Kana beno vwandaka ve kuna, na yina beno vwandaka ata fioti ve to ke vwanda ata fioti ve.

233 Samu, mu lenda nata ve, na ba-rein ya munu, mwana ya bakala yayi *awa* to bakala yina *kuna*, mu lenda kaka kunata bana ya munu, mpe ba ke baka kifwani ya munu. Alleluia. Beno me mona yawu?

234 Bana-bakala mpe bana-bakento vwandaka na kati ya Nzambi na mbandukulu. Ntangu yayi beno tala. Beno keke na Luzingu ya Kukonda nsuka, beno ke tuba. Beto ke kwikila yawu, ti beto keke na Luzingu ya Kukonda nsuka. Mbote, ya keke kaka na mutindu mosi ya Luzingu ya Kukonda nsuka, mpe ya keke Nzambi. Ya keke kaka kima mosi yina keke ya Kukonda nsuka, ya keke Nzambi. Na yina kana beno keke na Luzingu ya Kukonda nsuka, Luzingu yina keke na kati ya beno vwandaka ntangu nionso, mpe beno vwandaka na kati ya ba-rein ya Nzambi na ntwala ti yinza kuvwanda. Mpe ntangu Ndinga Yawu mosi. . . Yesu Yandi mosi me bokilama Ndinga, mpe na Santu Jean 1, me tuba, “Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi. Mpe Ndinga kumaka muntu mpe zingaka na kati-kati ya beto.” Na yina beno vwandaka na kati ya ba-rein ya Yesu, mpe kwendaka na Calvaire na Yandi. Beno fwaka na Yandi, mpe beno vumbukaka na Yandi. Mpe bubu yayi beto me vwanda na bisika ya Mazulu kati na Yandi, ya kufulukuka na Mpeve ya Yandi, bana-babakala mpe bana-bakento ya Nzambi. Kufwa na Yandi, me vumbuka na Yandi. Ya kieleka.

235 Ntangu yayi na yina, ntangu yayi, ntangu yayi beno lenda vwanda na ngwisani na Yandi. Beno lenda vutuka kuna ve, samu beno vwandaka kaka Ndinga kati ya Yandi, nkuna. Kasi ntangu yayi Yandi me monisa beno, mpe ntangu yayi Yandi zola ti beno vwanda na ngwisani na Yandi. Na yina Yandi kulumukaka, kumaka muntu ti Yandi lendaka na mutindu ya kulunga kuvwanda na ngwisani na beno. Beno me mona ngwisani ya kulunga? Oh, la la, mansweki ya mudindu ya Nzambi! Wapi mutindu ya keke mbote! Beno me mona, Nzambi lendaka ve kuvwanda na ngwisani kati na Mpeve, na yina Nzambi kumaka muntu na beto.

236 Yesu Klisto vwandaka Nzambi Yandi mosi, me monisama, samu, Yandi vwandaka Mwana samu Yandi butukaka, kasi ya vwandaka kaka tabernacle samu Yandi kuzinga kuna. “Muntu ve me monaka ntete Nzambi, kasi kaka yina basikaka na Tata me lakisa Yandi.” Nzambi tungaka Yandi mosi yinzo mosi, nzutu mosi samu na kuzinga kuna, kulumukaka samu ti beno lendaka simba Yandi. Timothée ya Ntete 3:16, “Ya kieleka, ata muntu lenda kumanga ve ti mansweki ya lukwikilu ya beto keke ya nene; Nzambi me monisama na yinza mutindu muntu, Bawanzio monaka Yandi, ba kwikilaka Yandi, ba zangulaka Yandi na Nkembo.” Beno me mona? Ntangu yayi Yandi. . .

237 Beno na kuvwandaka muntu, mpe Yandi na kuvwandaka muntu, na yina beno lenda vwanda na ngwisani ntangu yayi,

samu Yandi vwandaka kinama ya zola ya Nzambi. Nzambi kele zola. Ya kieleka? Mpe Yesu vwandaka kinama ya zola ya Nzambi. Mpe ntangu kinama ya zola monisamaka, na yina, yina vwandaka Nzambi Yandi mosi; binama nionso yina vwandaka na zulu ya Yandi, kwisaka na Yandi, “Nionso yina Tata pesaka Munu, ke kwisa na Munu.” Ya kieleka, ba zolaka zaba bawu na ntwala. Kana ya vwandaka mutindu yina ve, beno zolaka vwanda kuna ve. Yimeni. Ya kieleka.

²³⁸ Ntangu yayi beto lenda vwanda na ngwisani, na kati ya bimvwama ya Ndinga ya Yandi, mpe na yina beno kele kitini mosi. Beno kele kitini ya Ndinga; samu Yandi vwandaka Ndinga na mbandukulu, beno kele Ndinga ntangu yayi. Beno me mona? Mu ke longa na nkokila yayi, to na Lumingu to mosi ya bilumbu yayi ntangu mu ke kuzwa, samu na yina Ndinga kele, beno me mona. Mpe ntangu yayi beno kele kitini ya Ndinga.

²³⁹ Beno kuwa. Ya kele na kima mosi mu lenda sala ve. Mu lenda ve kukikembisa samu na bankooko ya munu. Ve, mu me basika na kubeba ya yimbi mingi. Tata ya munu vwandaka Irlandais. Mama ya munu vwandaka Indienne squaw, kati-kati Indienne; mama ya yandi vwandaka Indienne, ya kuzwaka pension. Ntangu yayi, bawu nionso, binwa-malafu, mingi na kati ya bawu me kufwa na basapatu na makulu, na kunwana, minwani-mvita ya minduki, mpe nionso yina. Mu lenda ve kukikembisa samu na kima mosi ve samu na yawu, samu bankooko ya munu mpe yintu ya dibuta ya munu kele ya boma.

²⁴⁰ Kasi, mpangi, ya kele na kima mosi mu lenda kukikembisana yawu, mu lenda kukikembisa na Mfumu ya munu Yesu Yina me vuukisa munu. Mpe na ngolo ya Yandi ya kusoba me kuna nkuna, na predestination, mpe mu monaka Yawu. Mu kele mwana ya nani ntangu yayi? Yinga. Mu lenda kukikembisa na Yandi. Mpe mu me lutisa bamvula makumi tatu na tatu ya luzingu ya munu, na kukikembisaka na Yandi. Kana Yandi ke pesa munu bamvula makumi tatu na tatu yankaka, mu ke meka na kukikembisa diaka na Yandi. Beno me mona? Mu lenda kukikembisa na Nkooko ya munu alleluia, Yandi yina vuukisaka munu mpe kunaka nkuna ya Luzingu na kati *awa*, mpe bika mu tala na Ndinga yayi, yina me fidisa Mpeve ya Yandi mpe tubaka, “Yawu yayi awa. Tuba *yayi*, mpe ya ke salama. Sala *yina*.” Mpe oh, la la, mu lenda kukikembisa na Yandi! Wapi mutindu Yandi salaka yawu? Na kusukula masa na nzila ya Ndinga, bamasa ya nkabisa. Mu ke zola ti beto tendula yawu.

²⁴¹ Bakwikidi ya kieleka yina ba zabaka na ntwala ke kangama na Ndinga samu ba kele kitini ya Ndinga yina.

²⁴² Oh, bambwetete yina ke yenga-yenga, tii yinki ntangu beno ke yenga-yenga? Beno ba-Methodiste, ba-Baptiste, ba-Presbytérien, banzenza, nionso yina beno lendaka vwanda, bambwetete yina ke yenga-yenga, katuka dibuundu mosi na yina

yankaka, dikunzi mosi na yankaka, mpe television na television, yinza na yinza, samu na yinki beno ke kwisa ve? Yandi ke zola kuvwanda na ngwisani na beno. Yandi ke na nsatu ya beno. Yandi zola kusoba beno samu na kukumisa mabanza ya beno ya malu-malu, ya kele samu na dibuundu ve to denomination, kasi samu na Ndinga ya Yandi, na yina, beno kele kitini kana nsatu yina kele na kati ya beno.

Kiese na bayina kele na nzala mpe mpwila ya kieleka: samu ba ke fuluka. (Beno me mona? Uh-huh.)

²⁴³ Mpe Yandi me fidisa ngolo ya Yandi ya kusoba, samu na kubasisa beno na kutengama yayi ya nsambulu yina beno kele. Na kati ya kutengama ya kawo yayi beto kele, Nzambi me fidisa ngolo ya Yandi ya kusoba, Ndinga ya Yandi, yina me siamisama, yina me ndimama, samu na kubasisa beno na kutengama yayi ya nsambulu ya kukondwa kuzaba yina beno ke tambula, “kinkonga, mpofo, mputu, mpe nge zaba yawu ve.” Beno banza na yawu, bankundi.

²⁴⁴ Beno zaba, Nzambi fidisaka ngolo ya Yandi ya kusoba samu na kulungisa Ndinga ya Yandi, mpe sobaka nzutu ya muvimba ya Sarah mpe Abraham. Sobaka bakala ya kiboba mpe kento ya kiboba, samu Yandi silaka ti Yandi ke sala yawu.

²⁴⁵ Mpe yina Nzambi ke silaka na kusala, yawu yina Yandi ke sala. Ya ke na kima mosi ve, kima ve. . . Kima nionso ya kubeba, Nzambi lenda ve kusala na yawu. Kasi Yandi ke keba Ndinga ya Yandi, mpe Yandi ke fidisa Mpeve ya Yandi! “Munu Mfumu me kuna Yawu. Mu ke mwangisila Yawu masa na mwini mpe na mpimpa, mbayi-mbaya ba ke botula yawu na maboko ya Munu.” Biblia me tuba yawu.

²⁴⁶ Oh, bamwetete yina ke yenga-yenga, beno yina kele na nsatu na kati ya ntima ya beno! Beno fwana vwanda na yawu, to beno zolaka vwanda ya kuvwanda awa na suka yayi. Mpe beno zolaka ve kuvwanda na kati ya mabuundu yina mpe bivinga yina ya nene, mpe na kati ya bima yina beno kele, na nganda mpe na kati ya yinsi, kana Kima mosi ve me kotisa beno kuna. Muntu mosi me tuba na beno. Beno kwenda ntama mingi ve. Ya kele na kusukula ya masa na nzila ya Ndinga, yina ke kumisa beno mpembe mutindu mvula mpembe. Oh, bana ya Nzambi, beno kuwa! Beno bikala ve na kati ya kutengama yina. Beno basika na yawu. Abraham kwikilaka Nzambi, mpe bokilaka nionso ya kuswaswana. . .

²⁴⁷ Beno ke tuba, “Wapi mutindu mu ke zinga? Wapi mutindu mu ke sala *yayi?*” Ya kele kisalu ya Nzambi. “Wapi mutindu mu ke sala yawu? Ba-associé ya munu ke manga munu.”

²⁴⁸ Nzambi tubaka, “Yandi yina ke manga tata ya yandi, mama ya yandi, kento ya yandi, bakala ya yandi, mabuta ya yandi, bayinzo ya yandi; Mu ke pesa yandi mabuta mpe bayinzo, Mu ke pesa bawu batata mpe bamama, mpe bampangi ya babakala mpe

bampangi ya bakento, na yinza yayi, mpe Luzingu ya Kukonda nsuka na yinza yina ke kwisa.” Ya kele nsilulu, nkundi. Ti, oh, ba fwana losila yawu masa! Konso nsilulu Nzambi ke salaka ke salama. Konso Nkuna ya Nzambi kele nsilulu.

²⁴⁹ Mpe, mpangi-kento, sukisa kuzengisa bansuki yina, samu ya kele yimbi na ntwala ya Nzambi. Beno bika kulwata bilele yina, ya kele busafu samu na Yandi!

²⁵⁰ Beno bampangi-babakala, beno babakala, beno sukisa kupesa madia na ba-denomination yayi, na kusalaka bima yayi, mpe kubika bakento ya beno kusala bima yayi. Ya kele mbote ve samu na Baklisto.

²⁵¹ Beno vutuka na Ndinga! Beno baka Ndinga yina, Ya ke kula. Ya fwana kukula. Ngolo ya Nzambi samu na kusoba yina zangulaka Yawu na kisika ya ntete, Yandi kele kaka na nzila ya Yandi ya kuvutuka, ke vutula Yawu diaka ntangu yayi. Yandi ke na kuvutuka diaka na kisika yina ya vwandaka.

²⁵² Enoch zangukaka, na lufwa, na nzila ya ngolo ya Nzambi samu na kusoba. Samu na yinki Nzambi salaka Yawu? Samu na mbandu ya kuzanguka ya Dibuundu yina ke kwisa. Yinga. Elie vwandaka mutindu mosi.

²⁵³ Nzutu ya Yesu bakaka luzingu na manima yawu kufwaka. Mpe na kati ya ntoni, nzutu ya Yesu bakaka luzingu na nzila ya Ndinga ya Nzambi; mpe sobaka, katuka na lufwa, kifwani ya madidi, na mvumbukulu, Mwana ya Nzambi ya nkembo. Samu ti profete, Psaume 16:10, kana beno zola kusonika yawu, 16:10, me tuba, “Mu ke bika ve moyo ya Yandi na difelo, to Mu ke bika ve Santu ya Munu Mosi kumona kupola.” O Nzambi!

²⁵⁴ Ndinga fwana salama, ya kele Ndinga ya Nzambi! Beno kuna Yawu na kati ya ntima ya beno, kana beno zola kwenda na Enlevement. Kana beno zola vwanda Baklisto ya kieleka, beno tula Ndinga yayi. Mutindu mu ke kwikila ya vwandaka Ezéchiél, Nzambi tubaka, “Baka buku yina mpe mina yawu,” ti profete mpe Ndinga ke kuma mosi. Mpe konso nsilulu na kati kuna fwana monisama yawu mosi, samu ya kele Nkuna ya Nzambi ya kieleka. Beno bika ve mwa ba-théologien yina kuna kumeka na kubasisa Yawu na beno. Beno bika ve yandi mwangisila beno science yina ya nsuni mpe luzabu, mpe malongi. Beno kwikila Nzambi!

²⁵⁵ Abraham bakaka ve kusosa-sosa ya science ya kilumbu ya yandi, yandi tubaka, “Mu me nuna mingi samu na kuzwa bébé, mu me kwenda ntama mingi. Mu me sala *yayi, yina, to yankaka.*” Kasi yandi bokilaka nionso yina vwandaka ya kuswaswana, na Ndinga ya Nzambi, mutindu ti ya vwandaka ve. Mpe yandi tenga-tengaka ve na nsilulu ya Nzambi, na nzila ya kukondwa lukwikilu; kasi ya vwandaka na kikesa, na kupesaka lukumu na Nzambi. Yandi zabaka ti Nzambi vwandaka na kiyeka ya kulungisa yina Yandi silaka.

²⁵⁶ Oh, bana-babakala yina ke yenga-yenga, ya kutengama na nzila bansinga ya mfinda ya ntoto yayi! Bana-bakento yina ke yenga-yenga, ti bisika mpe bamvwatu ya yinza yayi me benda beno! Mpe, mpangi-kento ya luzolo, beno lenda baka munu mutindu manivelle ya ntama, kasi mosi ya bilumbu yayi ntangu beno ke kutana na yina Florence Shakarian me kutana na yawu na nkokila yina; yandi vwandaka vwanda na kati ya kivinga yayi, mpe, na kisika yayi, mutindu beno zaba. Ntangu beno ke kutana na yawu, beno ke mona ti, munu ve, kasi Ndinga yayi kele kieleka. Beno vwanda ntama ya bayinzo ya kuzengisa bansuki, bamagazini ya mvwatu. Beno vwanda ntama ya bima yina.

²⁵⁷ Beno ke tuba, “Samu na yinki beno ke longa bawu ve bima ya nene, wapi mutindu kuvwanda *yayi*?” Beno banda kaka na ABC ya beno, na manima beto ke kwisa na bantalu. Beno me mona? Beno banda kulonguka, “yina kele kisalu ya beno ya kusungama.”

Mu ke bondila beno, bampangi, na mawa ya Nzambi, ti beno pesa nzutu ya beno mutindu munkayulu ya moyo, ya santu, mpe yina me ndimama na Nzambi, yawu yina kele kisalu ya kusungama.

²⁵⁸ Beno sala kaka “kisalu ya beno ya kusungama,” Nzambi ke tala nionso ya yawu me bikana; beno me mona, kaka kubanza bima tina beno lenda kubanza beno mosi mpe kusala. Ya kele ve. . . Ya kele mbote ve samu na kento na kukatula bilele, mpe kubasika awa mpe kusala mutindu yina, na yina Biblia ke fundisa yawu? Ya kele mbote ve samu na bakala na kukilosa yandi mosi na dogme ya mutindu yina mutindu beto ke na yawu bubu yayi, mpe bima yayi nionso awa, mpe bima yayi nionso ya seminere, mpe bima ya mutindu yina, ntangu ya me swaswana kieleka na Ndinga ya Nzambi? Beno me mona?

²⁵⁹ Bikoba ya Esaie, yandi vwandaka kaka muntu mutindu nionso na bikoba ya masumu. Yandi tubaka, “Mfumu, mu kele na kati ya bantu ya masumu, mpe mu kele na bikoba ya masumu. Mawa ya munu samu mu me mona Nzambi.” Mpe Wanzio kulumukaka, bakaka Tiya, Tiya ya Santu na autel ya Nzambi, mpe sobaka bikoba ya yandi; na bikoba ya muntu ya kuyenga-yenga, na bikoba ya profete na MUTINDU ME TUBA MFUMU. Ngolo ya Nzambi samu na kusoba!

²⁶⁰ Milobi-bantu nkama mosi na makumi zole, mpe—mpe mwa biboba ya miteki ya mpúmbú, ya bakento, mpe bayankaka vukanaka bawu mosi kuna na kivinga ya zulu mpe kangaka bielo, bayankaka na kati ya bawu lendaka ve kusonika bankumbu ya bawu. Nzambi sobaka bawu na milobi ya bambisi, na milobi ya bantu; babakala mpe bakento ya bala-bala, na basantu ya Nzambi, yina ke kufwaka ve. Ngolo ya Nzambi samu na kusoba!

²⁶¹ Paul, mambele ya dibuundu mosi, Presbytérien, Methodiste, Baptiste, Pentecotiste, to kima mosi; kuna na bala-bala yandi kwendaka, na mpeve ya yandi ya nene ya ntembe na kati ya yandi, ti yandi zabaka mingi kulutila bayankaka nionso. Yandi basikaka na Gamaliel, mosi ya milongi ya kulutila mbote yina vwandaka na yinsi. Yinki salamaka na nzila ya yandi kuna na Damas, samu na kukanga nkonga ya bantu yina vwandaka kwikila na Ndinga ya Nzambi? Na nzila ya yandi kuna, yandi kubwaka na ntoto, mpe yandi kuwaka Nsangu. Mpe Yawu sobaka yandi katuka mambele ya dibuundu mpe muyengi-yengi ya dibuundu; na profete ya Nzambi, yina sonikaka Ndinga ya Nzambi, na Ngwisani ya Malu-malu. Katuka mambele ya dibuundu na santu mosi!

²⁶² Oh, mbwetete yina ke yenga-yenga, beto sukisa. Mwana yina ke yenga-yenga, Nkuna yina ke yenga-yenga yina ke kwenda sika na sika, na kati ya kutengama yayi; beno vutuka, na suka yayi, bana. Pardo beno kuwa munu mutindu—mutindu muntu yina ke meka na kutelama kati-kati ya luzingu mpe lufwa.

²⁶³ Kuna na nganda ya yinsi kisika radio ke kwenda kana beno ke na kulanda kaka, beno yina ke na kuyenga-yenga na kisika mosi, pardo beno vwanda diaka muniti mosi. Mu zaba ti ntangu me luta awa na Tucson to, beno lemvokila munu, Phoenix, ya me bikala minuti makumi zole samu na kukuma na ngunga ya kumi na zole. Mpe mu me baka bantu yayi awa na suka nionso. Mu me kanga beno ntama ya kusalu ya beno mpe bima. Kasi beno tala, bankundi ya luzolo, beno lendaka vwanda ntama na Nzambi kukonda nsuka. Pardo beno vutuka na suka yayi. Beno zola ve? Ya kele na kivinga na Kiziba.

Ntama kuna na kidikilu, mu zaba ti ya ke ya kieleka,

Bébé mosi me butuka samu na kuvulusa bantu na masumu.

Jean monaka Yandi na kumu ya mubu, Mwana-dimeme samu na mvula na mvula,

Oh, Klisto, yina ba Komaka na kulunsi ya Calvaire.

Oh, mu zola Bakala yayi ya Galilée, ya Galilée, Samu Yandi me sala mingi samu na munu.

Yandi me lemvokila masumu ya munu, me fulusa munu na Mpeve-Santu;

Oh, mu zola, mu zola Bakala yina ya Galilée.

Mufutisi mpaku kwendaka na tempelo samu na kusamba kuna kilumbu mosi,

Yandi bokaka, “O Mfumu, wila munu mawa!”

Yandi lemvokilaka yandi masumu nionso, mpe ngemba ya lembami fulukaka na kati ya

yandi;
Yandi tubaka, “Beno kwisa tala Bakala yayi ya Galilée.” (Kieleka.)

Kikata tambulaka, baba tubaka,
Ti ngolo tubaka na zola na zulu ya mubu;
Mpofo kumonaka, mu zaba ti ya ke kaka
Mawa ya Bakala yina ya Galilée.

264 Beno fwanikisa yina na kosalu ya bubu yayi.

Kento yina na dibulu ya masa, Yandi tubaka na
yandi masumu ya yandi nionso,
Mutindu yandi vwanaka na babakala tanu na
ntangu yina.
Ba lemvokilaka yandi masumu nionso, mpe
ngemba ya lembami fulukaka na kati ya
yandi;
Yandi bokaka, “Beno kwisa tala Bakala yayi ya
Galilée!”

265 Kento, Yandi lenda sala mutindu mosi. Yandi me tanga ntima ya beno na suka yayi. Bakala, Yandi me tanga ntima ya beno. Oh, mufutisi mpaku, beto sambila!

Oh, mu zola Bakala yayi ya Galilée, ya Galilée,
Samu Yandi me sala mingi samu na munu.
Yandi me lemvokila masumu ya munu, me
fulusa munu na Mpeve-Santu;
Oh, mu zola, mu zola Bakala yina ya Galilée.

266 Beno ke zola Yandi ve, na munu, na suka yayi? Oh, kimpumbulu, nsumuki yina ke yenga-yenga, awa to na nganda kuna kisika beno lenda vwanaka, beno ke ndima Mfumu ya munu na suka yayi? Yandi kele Ndinga, mpe ba me nata Ndinga na beno. Beno zola ndima Yandi ve na suka yayi? Beno ke telemisa kaka maboko ya beno to kutelama, to kima mosi, mpe kusambila, beno tuba, “Mu ke zola kundima Yandi kaka na ntangu yayi. Mpangi-bakala, mu me zola. Mu ke zola kaka na ntangu yayi kundima Yandi.” Beno ke telama, muntu nionso yina me zola ba sambila yandi, mpe beno tuba, “Mu kele. . .” ba sambila samu na yandi, mu zola kutuba, “Mu kele nsumuki. Mu zola. . .” Nzambi sakumuna nge, tata. Muntu yankaka? Bantu nionso kusambila ntangu yayi, kaka na mwa ntangu fioti.

Oh, ntama kuna na kidikilu, (Ya vwanaka na kawo, beno zaba, yinza vwanaka.) mpe mu zaba ya ke ya kieleka,
Bébé mosi me butuka samu na kuvulusa bantu na masumu ya bawu.
Jean monaka Yandi na kumu ya mubu, Yandi vwanaka Mwana-dimeme samu na mvula

na mvula, (Mosi yina bubu yayi.)
Oh, Yandi keke Klisto, yina ba Komaka na
kulunsi ya Calvaire.

²⁶⁷ Beno ke zola Yandi ve bubu yayi na ntima ya beno nionso, na yina beno lenda basika na kati ya mutindu ya mambu ya yinza yina beno keke? Beno bakento, beno babakala, oh, samu na yinki beno me vwanda awa na ntangu yayi nionso? Ya ke talisa ti ya keke na kima mosi kuna na kati ya beno, ya keke na kima mosi kuna keke na nzala mpe mpwila. Beno zolaka ve kuvwanda awa bangunga zole yayi to tatu, ya kuvwanda na kati ya kivinga mutindu yayi; ya keke na kima mosi. Beno zola ve kaka kuwidikila yawu bubu yayi? Kubika bamvwatu mpe science, mpe bima yina nionso ya yinza, kukwenda ntama ya mabanza ya beno na ntangu yayi, mpangi-bakala ya luzolo to mpangi-kento ya luzolo.

Mabuundu ke na kuvukana, bayinsi ya nene ke
na kupanzana, Israel ke na kuvumbuka,
Bidimbu yina bapofete zabisaka;
Ba ke na kutanga bilumbu ya Bantu ya
makanda, ya kufuluka na boma ya nene;
“Vutuka, O nge yina me zimbana, na yina ya
nge.”

Kilumbu ya mpulusu me belama,
Bantima ya bantu ke na kutekita na boma;
Vwanda ya kufuluka na Mpeve, mwinda ya nge
ke pela mpe ke sema,
Beno tala na zulu! Mpulusu ya beno me
belama.

Bapofete ya luvunu ke na kuvuna, ba ke
manga Kieleka ya Nzambi
Ti Yesu Klisto keke Nzambi ya beto.

²⁶⁸ Ntangu yayi, ya keke kieleka. Beno zaba yawu, beto nionso, kilumbu yina beto ke na kuzinga. Kasi yandi tubaka:

Ya ke vwanda na Nsemo na ntangu ya nkokila,
Nzila ya Nkembo kieleka beno ke mona yawu.

²⁶⁹ Ya keke na kilumbu yina beto ke na kuzinga kaka na ntangu yayi. Nsemo ke sema kaka na nkokila ntangu mudidi ke vwanda, na mwa mpimpa, na mbwetete ya suka.

Na mwa mpimpa mpe na mbwetete ya nkokila,
Mpe na manima ya yina mudidi!
Bika ti ya vwanda ve na mawa ya mbote ya
nsuka,
Ntangu mu ke mata na masuwa na nsuka;

Na yina kukondwa bansinga nionso ya ntangu
 mpe ya kitamina,
 Mpe bakifuluka ya masa lendaka nata munu
 ntama
 Kasi mu ke zola kumona Pilote ya munu
 mbunzu na mbunzu
 Ntangu mu ke zabuka kibaka.

Kutuba na munu ve, na bantalu ya mawa,
 Ti luzingu kele kaka ndosi ya mpamba!
 Mpe moyo kele ya kufwa yina ke na kulala,
 Mpe bima kele ve yina ba ke banza.

Yinga, luzingu kele kieleka! Mpe luzingu kele
 ya nsaka ve!

Mpe ntoni kele ve lukanu ya yawu;
 Samu nge kele putulu, nge ke vutuka na
 putulu,

Ba me tuba yawu ve samu na moyo.

Baluzingu ya bantu ya nene nionso ke
 bambuka beto moyo,
 Mpe beto lenda sala baluzingu ya beto ya
 kitoko mingi,

Mpe, bankabisa, me bika na manima ya beto,
 Bitambi na zulu ya zelo ya ntangu;

Bitambi, ti ntangu yankaka muntu yankaka,
 Na kunataka masuwa na zulu ya nzadi ya nene
 ya luzingu,

Mpangi-bakala yina me suka ntima mpe yina
 me dinda,

Na kutala, ke baka diaka kikesa.

Bika beto vwanda na zulu, na yina, mpe kusala,
 Na ntima samu na kunwana nionso;

Kuvwanda ve mutindu fulu, kitwisi yina ba me
 twadisa!

Vwanda héro na kati ya kunwana!

²⁷⁰ Nzambi ya luzolo, ba kele ya Nge. Mu me mona babakala zole me telama, Tata. Mu ke sambila, Nzambi, ti Nge ke baka bawu ntangu yayi. Bawu zola vwanda bana ya Nge. Ba me vumbuka na kukondwa kuzaba ya luzingu yina ba vwandaka zinga, mpe ntangu yayi bawu zola vwanda ya lembami, ya malu-malu, na mbotika ya Mpeve-Santu na zulu ya Nkuna yina ba me kuna na kati ya bantima ya bawu bubu yayi. Nzambi ya Kukonda nsuka, Kiyidiki ya bima nionso, Yina salaka Ndinga ya Nge, mpe mu ke kwikila ti Nge zabaka ti babakala yayi ke sala yayi na suka yayi. Mu ke sambila, Mfumu, ti Nge ke mwangisila Ndinga yina masa, na mwini mpe na mpimpa, mpe ke bika ve Satana kubotula yawu na maboko ya Nge. Bika ya vwanda yinti yina na bantangu yankaka, na Paradiso ya Nzambi, ntangu ba ke

vutula diaka nionso, samu Ndinga ya Nge lendaka kubwa ve, ya ke vwanda diaka. Samu na yinza yayi. . .

²⁷¹ Mpe ya ke vwanda ve na civilisation ya mutindu yayi na yinza yina ke kwisa. Ya ke vwanda na batomabilu ve to kima mosi ve yina science me sala. Ya ke vwanda ve na bima ya mutindu yina na yinza yina ke kwisa. Kasi ya ke vwanda kaka na mutindu Mosi ya civilisation ya Nzambi yina Yandi ke kotisa na kimfumu ya nkembo. Samu, na civilisation yayi ya kele na kimbevo, lufwa, kiadi, bantoni, mpe nionso. Kasi na Kimfumu yina ke kwisa, ya kele na lufwa ve, kiadi ve, kimbevo ve, kinunu ve. O Nzambi, ya ke vwanda nionso ya malu-malu kuna, na civilisation ya Nge.

²⁷² Nzambi, soba beto bubu yayi, na ngolo ya Nge, na kukumisa mabanza ya beto ya malu-malu, na kubaluka katuka bima ya fioti ya yinza yayi ntangu yayi, samu na Ndinga ya Nzambi. Mpe bika beto vwanda ya malu-malu na ngolo ya Nzambi samu na kusoba na zulu ya Nkuna yina kele na kati ya ntima ya beto, yina beto ke kwikila, na bivangu yina ba me bokila bana-babakala mpe bana-bakento ya Nzambi. Yayi kele kisambu ya munu na Nge, Tata, samu na bantu, na Nkumbu ya Yesu. Amen.

²⁷³ Ntangu yayi samu na beno yina kele na kuwa na radio, kisika nionso beno kele, mu ke zola beno ndima Klisto kuna, mutindu Mvulusi ya beno mosi, mpe beno fuluka na Mpeve ya Yandi. Bandinga yina me tubama na suka yayi, bika Yawu kukota na kati ya ntima ya beno. Mpe bika beno ndima Yesu kuna. Mpe beno tala mbote luzingu ya beno, mpe beno tala yina beno ke zinga na ntwala. Mpe beno baka Kiyungulu ya muntu yina ke banzaka awa. Beno tala beno mosi ti beno ke sala kima yina na swaswana na Ndinga yayi, beno kwenda ntama na yawu, na nswalu nionso. Beno me mona? Samu, ya kele na Kiyungulu yina ke telemisa lufwa ntama ya beno, ya kele Ndinga ya Nzambi. Bandinga ya Yandi kele Luzingu, mpe Yawu ke bumba beno na lufwa.

²⁷⁴ Beno bantu yina kele awa ntangu yayi yina kele na yinzo yayi ya nene, mu me kanga beno ntangu ya yinda awa. Mu ke vutula matondo samu na mvwandulu ya beno. Mu ke sambila ti Nzambi ke bika ata fioti ve ti Nkuna yayi kufwa. Mu ke na kivuvu ti beno ke banza ve ti mu me telama awa samu na kutuba bima yayi kaka samu na kuvwanda ya kuswaswana. Mu ke tuba yawu samu na zola; mpe na kuzabaka ti ya kele ntangu mu kele muntu yina ke kufwa, mutindu mu kele na ntangu yayi, ya kele kaka ntangu mosi mu ke vwanda na kiyeka ya kulonga na bantu. Mpe mu zola Yesu Klisto. Yandi kele Mvulusi ya munu. Mpe beno bambuka moyo, mu zolaka vwanda na bala-bala kuna kana ya vwandaka ve samu na Yandi. Mu zolaka vwanda kuna na nganda; bibuti ya munu nionso, bantu ya munu nionso, vwandaka bansumuki. Kasi Nzambi, na ngolo ya Yandi samu na kusoba, mu zaba ti ya me sala munu kivangu ya luswaswanu. Mpe mu lenda—mu lenda

tuma yawu na beno, na kuvwanda mbote. Mpe ya ke bumba beno na bangunga ya mpasi. Ata mpe lufwa, kele na kielo, beno ke vwanda na boma ve. “Ya kele na kima mosi ve lenda kabisa munu na zola ya Nzambi, yina kele kati na Klisto.” Bika Nzambi sakumuna mosi na mosi ya beno, mpe kupesa beno Luzingu ya Kukonda nsuka.

²⁷⁵ Bantu yikwa na kati awa yina kele ve na Nkuna ya Nzambi, mbotika ya Mpeve-Santu? Beno zola kaka kutelemisa diboko ya beno, beno tuba, “Beno bambuka munu, Mpangi Branham, ti mu ke ndima Mpeve-Santu yina.” Ntangu yayi beno baka Ndinga na—na ntima ya beno, mpe beno kwikila Yawu. Ntangu yayi kana beno . . . Beno lenda kukitala beno mosi. Beno kwenda mpe beno tala na kitala-tala, mpe beno lenda mona kisika beno kele. Beno me mona, beno lenda zaba.

²⁷⁶ Beno ke tuba, “Mbote, mu me telemisa ve diboko ya munu, samu mu ke kwikila mu kele na yawu.”

²⁷⁷ Beno kukitala beno mosi na kitala-tala, na yina beno ke mona wapi mutindu ya mpeve ke na kuvuna beno, beno me mona. Mabanza yina me vunama! “Ya kele na nzila yina ke monana mbote samu na muntu, kasi nsuka ya yawu kele lufwa.” Ya kieleka?

Na kulunsi sika wapi Mvulusi ya munu
kufwaka,
Mu me kwisa kuna samu na kudila masumu ya
munu;
Oh, kuna Menga ya yandi pakulamaka na
ntima ya munu;
Nkembo . . .

²⁷⁸ Beno kanga kaka meso ya beno, na mwa ntangu fioti ntangu yayi, mpe beno yimbila Yandi kaka. Beto telemisa maboko ya beto.

Nkembo na Nkumbu ya Yandi, Nkumbu ya
Yandi ya kitoko!
Nkembo na Nkumbu ya Yandi!
Kuna Menga ya yandi pakulamaka na ntima ya
munu;
Nkembo na Yandi . . .

²⁷⁹ Mu zola ti beno Baklisto kupesana mbote mosi na yankaka, yina me vuluka.

Mu me vuluka na disumu na ngitukulu,
Yesu me kwisa zinga na kati ya munu,
Kuna na kulunsi kisika Yandi nataka munu;
Nkembo na Nkumbu ya Yandi!

Nkembo na Nkumbu ya Yandi, Nkumbu ya ntalu!

Nkembo na Nkumbu ya Yandi!

Oh, kuna Menga ya yandi pakulamaka na ntima ya munu;

Nkembo na Nkumbu ya Yandi!

²⁸⁰ Menga kele na germe ya Luzingu na kati ya Yawu, beno zaba. Yayi kele samu na yina me zaba Yandi ve:

Oh, kwisa na Kiziba ya bumvwama mpe ya lembami;

Losa moyo ya nge ya mputu na makulu ya Mvulusi;

Oh, dinda bubu yayi, mpe vwanda ya kulunga; Nkembo na Nkumbu ya Yandi!

Oh, nkembo na . . .

Beto kulumusa bayintu ya beto ntangu yayi mutindu beto ke yimbila yawu.

Nkembo na Nkumbu ya Yandi!

Kuna Menga ya yandi pakulamaka na ntima ya munu;

Nkembo na Nkumbu ya Yandi!

²⁸¹ Beno zola Yandi? [Dibuundu me tuba, “Amen.”—Mu.] Paul tubaka, “Mu ke yimba na Mpeve. Mu ke sambila na Mpeve.” Beto yimbila yawu na malembe nionso diaka, na maboko ya beto na zulu.

²⁸² Beno zaba, mpasi ya yawu, beto bantu ya Pentecote, beto me zimbisa kiese ya beto, beto me zimbisa ba-émotion ya beto. Mutindu Billy Graham tubaka na nokokila yina, “Balongi ya bawu, ba-col ya kubalula, ke kwenda na Sud, ke bula maboko, mpe ke zangula makulu ya bawu na zulu mpe na ntoto, mpe ke diata, ba vwandaka na kima yina ba vwandaka sepela na yawu.” Mbote, yinga, mu ke na Kima yina mu ke sepela na yawu. Beno me mona? Beno me mona? Yinga. Yinga, beto me zimbisa émotion ya beto.

²⁸³ Ntangu yayi beto telemisa kaka maboko ya beto. Beno vwanda na boma ve samu na masa ya meso, ya ke niongisa kima mosi ve, beno me mona. Ya ke niongisa ve. “Yandi ke kwenda kuna, na masa ya meso, kukondwa ntembe yandi ke vutuka diaka, na kunataka bambuma ya kitoko.” Mbote mingi.

Nkembo na Nkumbu ya Yandi, Nkumbu ya ntalu!

Nkembo na Nkumbu ya Yandi!

Kuna Menga ya yandi pakulamaka na ntima ya munu;

Nkembo na Nkumbu ya Yandi!

Nkembo na ya Yandi . . . (O Nzambi! Lukumu
na Nzambi!)
Nkembo na Nkumbu ya Yandi!
Kotisa Nkuna, Mfumu, na kati ya ntima!
. . . na ntima ya munu Menga kele;
Nkembo na Nkumbu ya Yandi!



NGOLO YA NZAMBI SAMU NA KUSOBA KNG65-0911
(God's Power To Transform)

Nsangu yayi ya Mpangi William Marrion Branham, kulongamaka na Kingelesi, na Kilumbu ya sambanu na suka, na kilumbu ya 11 ya Ngonda ya yivwa, na mvula 1965, samu na madia ya suka ya Ngwisani ya Yinza muvimba ya Bantu ya Mumbongo ya Nsangu ya mbote ya Muvimba na Ramada Inn na Phoenix, Arizona, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org